



JORNAL

do

Parlamento Nacional

VI. LEGISLATURA

1.ª SESSÃO LEGISLATIVA (2023-2028)

REUNIÃO PLENÁRIA DE 19 DE JULHO DE 2023

Presidente: Ex.^{ma} Sr.^a Maria Fernanda Lay

Vice-Presidentes: Ex.^{mos} Srs. Maria Teresinha da Silva Viegas e
Alexandrino Afonso Nunes

Secretária: Ex.^{ma} Sr.^a Virgínia Ana Belo

Vice-Secretárias: Ex.^{ma} Sr.^a Bendita Moniz Magno

SUMÁRIO

Sr.^a Presidente loka sessão plenária ne'e iha tuku 9 liu minuto 1 dadeer.

Antes da Ordem do Dia – ...

Ordem do Dia – Continuação da apreciação o Programa do IX Governo Constitucional.

Sr. Deputado no Sr.^a Deputada sira-ne'ebé halo intervenção mak hanesan: António Verdial (KHUNTO), Aniceto Longuinhos Guterres Lopes, Lídia Norberta dos Santos Martins no Maria Anabela Sávio (FRETILIN), Patrocínio Fernandes dos Reis (CNRT), Olinda Guterres (KHUNTO), Maria Rosa da Câmara «Bisoi» (CNRT), Antoninho Bianco

(FRETILIN), Armando dos Santos Lopes (PD), Óscar Lima no Helena Martins Belo (FRETILIN), Domingos Augusto «Deker» (CNRT), Mariquita Soares no Maria Angélica Rangel da Cruz dos Reis (FRETILIN), Maria Teresa da Silva Gusmão (PD), António Moniz Calau (FRETILIN), Luís Roberto da Silva (KHUNTO), Sância Florência Paixão Bano no Antoninho Doutel Sarmiento (FRETILIN), Maria Angelina Lopes Sarmiento no Abel dos Santos (PLP), António da Conceição «Kalohan» (PD) no Veneranda E. M. Lemos Martins (CNRT),

Sr.ª Presidente taka sessão plenária ne'e iha tuku 15 liu minuto 23.

Sr.^a **Presidente** (Maria Fernanda Lay): — Srs. Deputados, halo favor bele hola fatin.

Horas hatudu tuku 9 liu minuto 1 dadeer.

Sr. Primeiro-Ministro ho Srs. Membros do Governo, ami husu halo favor hola fatin.

Sua Excelência o Primeiro-Ministro do IX Governo Constitucional ho elenco governamental tomak, Senhoras e Senhores Deputados no audiência tomak mak ha'u respeita, bom dia.

Ohin ita fó continuidade ba apreciação do Programa do IX Governo Constitucional, hodi nune'e iha ona registros iha-ne'e para intervenção. Se bele, sé-sé mak halo intervenção, foti kedas liman para ami regista, hodi nune'e ita bele la'o di'ak liu.

Entretanto, atu hahú, ami fó uluk ba Deputado António Verdial.

Sr. **António Verdial de Sousa** (KHUNTO): — Muito obrigado.

Sr.^a Presidente e componente Mesa, Excelência Primeiro-Ministro IX Governo Constitucional, Vice-Primeiro-Ministro no elenco governamental tomak, distinta e distinto Deputado mak ha'u respeita.

Sr.^a Presidente, ita hotu hatene katak ita-nia Estado Timor-Leste restaura ninia independência iha tinan 2002, to'o mai agora ita-nia Nação halo ona idade jovem ho 21 anos. Hanesan Deputado ou representante povo iha Uma-Fukun ida-ne'e, ha'u louva no parabeniza Excelência Primeiro-Ministro ho elenco governamental tomak ne'ebé halo esforço tomak hodi desenha plano prioridade sira atu implementa durante mandato.

Bancada Parlamentar Kmanek Haburas Unidade Nacional Timor Oan haree ba programa prioridade Governo dasiak nian ne'ebé agora ita debate no halo apreciação ne'e atu sai base fundamental ida no sai matadalan ba ukun durante tinan lima. Hanesan representante povo, aprecia ba programa neen, hanesan tuirmai: reafirma fali Estado de direito democrático; desenvolvimento capital social; desenvolvimento capital infraestrutura; desenvolvimento capital economia, consolidação governativa; no boa governação.

Ho plano sira-ne'ebé ami temi mak Governo apresenta mai iha Parlamento, maibé laran ladún haksolok tanba povo no Governo seidauk hetan compromisso ida ne'ebé esperança povo nian, sira hein hela, liga ba ita hotu nia campanha política halo iha palco político.

Hanesan Deputado ne'ebé hola parte iha Comissão ne'ebé trata assuntos constitucionais, lei no justiça, atu hatete katak ami haksolok tebes ho compromisso ne'ebé determinado husi IX Governo Constitucional, ne'ebé dehan katak atu restaura hikas Constituição no hadi'a hikas lei hirak ne'ebé agora daudaun vigora, ne'ebé la condiz ona atu conduz República ida-ne'e. Atu hatete katak ami

contente no hein ho esperança boot katak iha tinan lima ne'e ita bele halo buat ida ne'ebé fó satisfação ba povo Timor-Leste.

Senhor Primeiro-Ministro, Senhoras Deputadas e Deputados, hanesan Deputado, nafatin ami hato'o calorosas saudações ba cidadão timoroan tomak ne'ebé hola parte iha votação foin liubá. Ita labele haluha katak agora daudaun IX Governo Constitucional hamutuk ho representante povo iha Uma Democracia ida-ne'e tanba povo Timor-Leste. Serbí sira-ne'e tem que sai ita-nia prioridade dahuluk, servi-lo deve ser a nossa primeira prioridade.

Hanesan Deputado ida husi Bancada KHUNTO, hato'o ami-nia parabéns ba IX Governo Constitucional, ne'ebé ohin leron daruak nafatin debate Programa Governo Constitucional Dasiak iha Uma Democracia ida-ne'e. Hanesan ita hotu hatene no tem que compreende, katak Deputado sira hetan fiar hala'o mandato eleitorado no agora Deputado sira representa eleitorado sira-nia aspirações, mehi no esperança.

Bancada KHUNTO hein katak próximas sessões no agenda executiva no legislativa sai útil no produtiva ba Nação, nune'e mós ba bem-estar povo timorense nian. Ida-ne'e oportunidade única ba ita tomak, órgão executivo no órgão legislativo, hamutuk serbí ita-nia Nação, RDTL. Ita-nia querido País, República Democrática Timor-Leste, precisa Governo ida ne'ebé forte no estável, ne'ebé bele fornece liderança ida-ne'ebé eficaz.

Atan ha'u, hanesan Deputado, aplaude ba matenek povo Timor-Leste nian, ne'ebé iha vontade usa estabilidade, honestidade no desenvolvimento iha Timor-Leste, ne'ebé hamriik filafali hodi hateke ba oin, precisa ita hotu nia consciência katak povo Timor-Leste vota ba Timor-Leste ida-ne'ebé unido, forte no moderno.

Iha-ne'e, hanesan Deputado, ha'u atu hatete hela liafuan ida ba instrumento político lima ne'ebé hetan assento iha Uma-Fukun, Parlamento Nacional. Ha'u haree tuir perspectiva ha'u-nian, atu hatete de'it liafuan: força tebes domina husi Ita-Boot sira. Maibé, hanesan Deputado mós, ha'u husu ho hakraik an atu atura ho balanço ka *pertimbangan* ne'ebé aas, ética, atu nune'e labele rai hela cultura negativa, ódio no vingança, ne'ebé ami oposição fila hodi contra ba buat hotu ka iniciativa tomak. Atu hatete de'it, di'ak ka la di'ak, ne'ebé hato'o husi maioritário iha detrimento povo ba nação, Bancada KHUNTO nia esperança katak ita hamutuk estimula debates ne'ebé saudável hodi hamosu resultado ne'ebé positivo.

Partido KHUNTO lakohi Parlamento ida-ne'e monu iha dalan klaran iha ninia mandato, Partido KHUNTO hakarak Legislatura ida-ne'ebé existe no dura to'o fim nia mandato, tinan lima. Partido KHUNTO mós respeita ba coligação maioritária husi Partido CNRT no PD ne'ebé iha poder executivo. Atu hatete de'it: iremos apoiá-los, ami sei apoia ba órgão executivo nia mandato hodi serbí Nação bodik ba povo ida-ne'e, especialmente atu hasai povo husi mukit no kiak, no ami tau esperança

boot ba IX Governo Constitucional, *apalagi* liderado husi Comandante em Chefe das FALINTIL, Maun Boot Kay Rala Xanana Gusmão.

Promoção Governo ida ne'ebé di'ak, atu hatete de'it, Parlamento mós precisa Parlamento ida ne'ebé bele forte no efetivo hodi hala'o nia função tolu ne'ebé importante, ha'u cita iha-ne'e: ida, representação; rua, supervisiona órgão executivo; tolu, elabora leis.

Hanesan ita hotu hatene no ita rasik hatene, katak ita-nia capacidade hodi controla gastos públicos hodi fó assistência ne'ebé di'ak ba ita-nia povo, ema timorense iha fatin hotu-hotu buka Parlamento no Governo hodi buka solução ba problemas ne'ebé sira hasoru lora ba lora. Ita-nia povo hein atu ita ajuda sira, ita-nia povo hein hela ho esperança atu ita ajuda hadi'a economia, fornece campo de trabalho ba desempregados, hasa'e acesso ba educação, assistência médica no em geral ita tem que fó esperança.

Parlamento ida-ne'e, ha'u atu hatete katak bodik ba povo Timor-Leste no povo hakarak ita-nia *kejujuran* ka honestidade, ita-nia responsabilidade ba povo nia necessidade. Bancada KHUNTO husu ita-nia serbisu hamutuk iha Uma Democracia ida-ne'e, ne'ebé bele resulta leis ne'ebé di'ak no suporta Programa IX Governo Constitucional, atu nune'e ita hotu, órgão legislativo no órgão executivo, hela ho liafuan ida hanaran sucesso ka *sukses*.

Povo Timor-Leste fó mandato mai ita ne'ebé claro, sira hakarak haree Timor-Leste ida-ne'ebé moris ka vibrante, dinâmico ka *dinamis*, próspero ka *sejahtera*. Sira hakarak haree Timor-Leste ida-ne'ebé halo ema hotu nakonu ho orgulho no hetan sentimento respeito husi comunidade internacional, nakonu ho esperança, no povo hein resultado ida-ne'ebé lailais. Ita tem que hakuak oportunidade ida-ne'e no halo tuir esperança ida ne'ebé aas tebes. Tinan lima hahú agora, ita bele hatete ho fiar an no orgulho, katak ita halo tiha buat ruma ba rai doben Timor-Leste.

Excelência Primeiro-Ministro no elenco IX Governo Constitucional mak ha'u respeita, ha'u lê tiha ona Programa Governo, ha'u contente no satisfeito tebes, tanba iha áreas infraestruturas nian ha'u hatene katak IX Governo Constitucional haree Plano Estratégico Desenvolvimento nu'udar estratégia di'ak hodi bele resolve problema infraestrutura, problema capacidade no seluseluk tan. Plano ida-ne'e mai ho objetivo katak tinan 2011 a 2030 nia laran sei garante ba população iha território nacional iha acesso ba infraestrutura básica, fornecimento bee moos ne'ebé di'ak, acesso ba estrada ne'ebé di'ak no seguro, comunidade sira iha área rural sei iha acesso ba energia eletricidade, ema hotu sei iha acesso ba tratamento saúde no educação, acesso ba *internet* liuhossi *wireless* nacional ba ema hotu no la iha pobreza, la iha kiak. Maibé, depois plano ne'e la'o ho duração tempo tinan 13 nia laran, iha buat balu mak seidauk realiza ka seidauk iha mudança ne'ebé significativo. Nune'e mós bainhira ita haree ba Plano Estratégico Desenvolvimento Nacional 2011 a 2030...

Sr.^a **Presidente**: — Sr. Deputado, bele conclui.

Sr. **António Verdial de Sousa** (KHUNTO): — ... di'ak, tanba tempo, ha'u atu hatete liafuan badak de'it: Excelência Primeiro-Ministro, Vice-Primeiro-Ministro no elenco IX Governo Constitucional, hela ho esperança katak Partido KHUNTO sei fó votos ida-ne'ebé di'ak atu nune'e desenvolvimento bele la'o!

Rua, husu ba membros IX Governo Constitucional atu suporta ita-nia Excelência Primeiro-Ministro, Maun Boot Kay Rala Xanana Gusmão, atu nune'e hodi desenvolvimento ne'e ba ita-nia rain, Timor-Leste. No, keta haluha política descentralização administrativa, ida-ne'e tem que la'o!

No ida fali, ha'u tatoli mensagem murak ba iha Excelência Ministra Educação, favor boot ida tau hela matan ba problemas ka casos ligado recursos humanos ho áreas infraestruturas educativas iha Ita-Boot nia área rasik.

E ha'u atu hatete mós ba Ministra Saúde, favor ida tau matan ba Hospital Nacional Guido Valadares, cria condição bá atu nune'e ita bele atende ita-nia paciente sira ho di'ak no saudável.

Ha'u la iha liafuan seluk, atu hatete de'it, Bancada KHUNTO nafatin suporta, sei fó voto ida ne'ebé di'ak atu nune'e Governo bele halo desenvolvimento.

Muito obrigado, Sr.^a Presidente.

Sr.^a **Presidente**: — Obrigada, Sr. Deputado.

Tuirmai, molok ita continua ho intervenções, iha pedido de ponto de ordem husi Sr. Deputado Presidente Aniceto Guterres. Faz a favor.

Sr. **Aniceto Longinhos Guterres Lopes** (FRETILIN): — Obrigado.

Bom dia ba Sr.^a Presidente, membros da Mesa, Excelência Sr. Primeiro-Ministro ho membro Governo tomak.

Ha'u atu renova de'it ha'u-nia sugestão horisehik kona-ba atu fixa ita-nia prazo de inscrição, tanto ba intervenção ohin ho aban, terceiro dia nian, e ha'u-nia sugestão ita fixa ba 12h00 ohin. Inscrição to'o 12h00, se liu ida-ne'e la iha inscrição, significa katak intervenção esgotado, para ita bele hakat ona ba fase sira seluk. Ne'e ha'u-nia sugestão ha'u renova, mas Plenário ida-ne'e tem que fixa tanba la consta iha guião.

Obrigado.

Sr.^a **Presidente**: — Muitíssimo obrigada, Sr. Presidente Aniceto.

E ha'u, com certeza, apela ba Srs. Deputados que querem fazer a intervenção para se inscreverem, e ita fixa 12h00 o mais tardar para as inscrições de hoje e amanhã. Muitíssimo obrigada.

E nune'e, ita continua ho Sr.^a Deputada Lídia Norberta.

Sr.^a **Lídia Norberta dos Santos Martins** (FRETILIN): — Obrigada, Sr.^a Presidente.

Bom dia ba Sr.^a Presidente do Parlamento, Vice-Presidentes, membros da Mesa. No ha'u-nia bom dia, dadeer di'ak mós, ba a Sua Excelência Primeiro-Ministro, Sr. Kay Rala Xanana Gusmão, Vice Primeiro-Ministro na'in-rua, membro do Governo, média no povo doben Timor-Leste.

Iha-ne'e dadeer kmanek ida-ne'e ami hakarak hato'o questão balu, ne'ebé hakarak hetan esclarecimento husi Governo. Hanesan ita hatene hotu, área educação, saúde, assegura qualidade moris ne'ebé di'ak ba povo mak nu'udar necessidade ba povo, e, ami haree katak iha IX Governo Constitucional mós hanesan continuidade ida ba governação anterior, hatuur mós setor hirak-ne'e nu'udar capital social ne'ebé tem que desenvolve. Ho nune'e mak ami aprecia tebes ba preocupação ne'ebé Sr. Primeiro-Ministro iha kona-ba oinsá mak atu desenvolve lian português hodi nune'e bele hadi'a ita-nia «*tetunguês*», hanesan horisehik Primeiro-Ministro ko'alia ne'e, liuliu ba ita-nia oan sira nu'udar futuro Nação nian.

E husi compromisso 17 ne'ebé Governo Dasiak hakarak alcança iha fulan 12 nia laran, ida mak liga ba implementação escola CAFE (Centro de Aprendizagem e Formação Escolar) iha posto administrativo hotu-hotu. E ami, nu'udar Deputada, iha tinan hirak liubá ami mós simu recomendação husi inan-aman sira katak sira hakarak tebes atu loke tan escola CAFE iha postos administrativos, hodi nune'e bele fó biban liután ka oportunidade ba ita-nia oan sira atu apreende lian português. Tanba ne'e mak iha oportunidade ida-ne'e ami mós hakarak husu: sá esforço mak responsável ne'ebé tutela ba área educação halo hodi nune'e bele loke tan escola CAFE iha postos administrativos?

Além de ida-ne'e, ita mós haree katak iha setor educação, mesmo que nia hanesan fulcral ba desenvolvimento ba rai no ba povo ida-ne'e, maibé ita nota katak iha questão balu ne'ebé precisa atu preserva iha ida-ne'e, ne'e mak hanesan valor humanismo timorense, no liuliu ita-nia identidade ida hanesan parte husi Ásia. E, ho ida-ne'e mak ami hakarak hatene mós sá esforço maka educação sei halo iha forma ida educação integrada, atu nune'e bele introduz mós cidadania cívica ba educação formal, hahú husi ensino pré-escolar to'o ensino secundaria. Ita mós nota katak iha Timor daudauk ne'e, formação ba professores desporto escolar ladún iha, prova mak aulas de desporto escolar mós ladún iha. Então, sá esforço mak Governo sei halo ba ida-ne'e?

Iha parte ida-ne'e, iha mós situação balu, ita hatene katak atu forma ema sai ema ne'e, ita precisa mós manorin ka professores, maibé ita mós tem que haree sira-nia condição. Ho nune'e mak ami hakarak husu: sá política mak Governo sei halo hodi nune'e bele hadi'a condição professores nian? Ida-ne'e ita liga liu ba sira-nia situação laboral.

Segundo, iha Programa Governo Dasiak nian iha administração pública, Governo planeia atu harii tan Agência Nacional ba Reforma no Modernização Administração Pública, maibé durante ne'e

ita haree katak Comissão da Função Pública ho INAP (Instituto Nacional da Administração Pública), sira mós hala'ó hela knaar ida-ne'e. Se ita iha ona instituição rua ne'e, tansá mak ita harii tan agência ida-ne'e? Será que ida-ne'e la'ós duplicação? Ou keta halo ida-ne'e mak forma ida para atu hasa'e eficiência?

Terceiro, iha processo adesão ba ASEAN, horisehik colega Deputado balu ko'alia ona e husi parte Governo mós hatán, maibé iha-ne'e ami hakarak husu kona-ba questão ida liga ho reformas nacionais. Iha Governo Dasiak nia prioridade ba ASEAN haree katak atu adere ba ASEAN ita tem que promove reforma nacional barak hodi nune'e bele tuir kedas diretrizes ASEAN nian, ho nune'e mak ami hakarak husu: liga ba ida-ne'e, será que ida-ne'e sei haree ba legislação sira ne'ebé ita atu hadi'a? Se hanesan ne'e, se iha lista de legislação balu ne'ebé atu hadi'a, bele ka lae fornece mai ami para ami bele hatene ida-ne'e mak sai parte husi reformas nacionais?

E além de ida-ne'e, ami liga mós ba iha desenvolvimento institucional ba política externa nian, iha-ne'ebá hatete katak sei halo processo racionalização no redimensionamento ba iha missões diplomáticas no consulares iha li'ur. Será que ida-ne'e mak sai hanesan fator ida para ita bele halo análise katak sei iha aumento ou diminuição de missões diplomáticas iha exterior? Tendo em conta iha adesão ba ida-ne'e, iha exigência seluk ida katak tem que ser iha aumento.

Ikusliu, ami termina, hakarak hato'ó mós ami-nia análise balu iha setor defesa. Iha-ne'e Governo dehan katak sei hakarak implementa sistema alerta nacional hodi responde ba desastres naturais no emergência, maibé iha sikun seluk iha Autoridade Nacional Proteção Civil. Governo mós dehan katak hakarak atu cria mecanismo alerta antecipada ba mós desastres naturais, ida-ne'e oinsá loos? Será que ida-ne'e la'ós duplicação? Ne'ebe, ami precisa hetan esclarecimento ida-ne'e, la'ós ami de'it maibé povo em geral mós, bele hatene saida mak ita hotu-hotu tau iha Programa ida-ne'e.

Obrigada, Sr.^a Presidente.

Sr.^a **Presidente**: — Obrigada, Sr.^a Deputada.

Tuirmai, Sr.^a Deputada Maria Anabela Sávio.

Sr.^a **Maria Anabela Sávio** (FRETILIN): — Obrigada ba oportunidade.

Bom dia ba Presidente Parlamento Nacional, composição da Mesa, colegas distintos Deputados, e Excelência Sr. Primeiro-Ministro ho elenco governamental tomak, audiência no povo rona-na'in sira.

Em primeiro de tudo, ha'u-nia apreciação ba IX Governo Constitucional, ne'ebé lidera husi Sr. Xanana Gusmão hanesan Primeiro-Ministro, ne'ebé mai ho hanoin furak liga ba Ita-Boot nia discurso horisehik no mós liga ba Programa IX Governo Constitucional. Sobre assunto Programa IX Governo Constitucional, mai ami la iha dúvida, tanba democracia ami minoria submete ba maioria, maibé

mantém firme ho oposição ida que construtiva e crítica e defende lia-loos. Bainhira iha buat balun ne'ebé la tuir regras, ami sei ko'alia nafatin para hadi'a.

Excelência Sr. Primeiro-Ministro, Ita-Boot nia promessa ba 120 dias nia laran sei halo auditoria ba instituição hirak ne'ebé menciona, liuliu ba Ministério Público, kona-ba irregularidade barabarak iha relatório anual. Sr. Primeiro-Ministro, opinião ida-ne'e mak FRETILIN hakarak, tanba FRETILIN buka lia-loos no FRETILIN hakarak combate corrupção iha rai lulik ida-ne'e. Ami aprecia no elogia tebes ba Sr. Primeiro-Ministro nia decisão, ho promessa hirak-ne'e espera que auditoria barak maka Tribunal de Contas halo tiha ona no fó-sai husi ninia relatório iha tinan 2019, bele iha continuidade. Espera katak resultado hirak-ne'e Ita-Boot tem que toma atenção tanba hatudu momoos katak falta de'it mak responsabilização. Maibé, sé mak atu responsabiliza ida-ne'e? Baseia ba dados, Tribunal de Contas, iha tinan 2016, halo auditoria ba 35 projetos adjudicação direta, ne'ebé hetan aprovação husi CAFI (Conselho de Administração do Fundo das Infraestruturas) entre tinan 2014 e 2015 hodi halo obra reabilitação no construção estrada urbana fase daruak ho valor 114 milhões mesak ilegal hotu. Ho violação ba princípios ne'ebé hatuur iha regras aprovisionamento público, ida-ne'e mak hatudu momoos katak la iha transparência. Tuir relatório auditoria, compara fali ho estrada ne'ebé halo iha Oe-Cusse, então nia qualidade di'ak liu compara ho ida iha Díli laran. Ida-ne'e mak realidade, dados ida-ne'e factos e dados ne'e Tribunal mak ko'alia, la'ós Anabela mak ko'alia.

Tuirfali, iha tinan 2020, Fundo Infraestrutura contrata professor ida apoio husi JICA (*Japan International Cooperation Agency*) hodi halo avaliação ba 36 projetos husi 1132 projetos ne'ebé completa ho execução. Relatório avaliação ne'e hatudu katak: primeiro, la iha prévio estudo viabilidade ba projeto sira iha momento ne'e; segundo, valor projetos ne'e aas liu custo *riil* no la iha supervisão; terceiro, projetos pronto ona, maibé la iha plano ba halo manutenção.

Relaciona ho Sr. Primeiro-Ministro nia promessa, ami espera katak bele iha continuidade ba relatório ne'ebé hatu'o ona husi Câmara de Contas no *exposed evaluation* ne'ebé povo bele acompanha no hatene sé mak atu responsabiliza ida-ne'e. Ami fiar katak IX Governo sei publica nia resposta iha 120 dias nia laran.

Excelência, relaciona ho Ró Haksolok, la kleur finaliza ona no sei mai iha Timor-Leste iha tempo badak. Iha tempo ne'ebá, Ita-Boot mak ukun, ida-ne'e resultado husi esforço ne'ebé Dr. Mari halo ona. Polémica kona-ba Ró Haksolok iha público sai hanesan polémica boot iha rai lulik ida-ne'e, tanba baseia ba dados, cronologia contrato ho Ró Haksolok, Dr. Mari sai hanesan terceira pessoa husi Sr. Xanana Gusmão e mós Sr. Pedro Lay, tanba Sr. Xanana nu'udar Primeiro-Ministro iha momento ne'ebá no Sr. Pedro Lay assume pasta Ministro de Transportes e Comunicação. Iha-ne'e público tem que hatene katak Ita-Boot na'in-rua mak foti decisão no entrega continuação contrato ba Dr. Mari hodi continua hala'o, dados completo iha-ne'e. Tanbasá mak durante ne'e Ita-Boot na'in-rua nonook de'it no lakohi esclarece ba público katak Ita-Boot na'in-rua maka halo adjudicação direta ba companhia

atu halo ró Haksolok? Karik atu halo auditoria, ami husu atu hahú auditoria husi Sr. Xanana Gusmão no Sr. Pedro Lay. Evidência mak ne'e...

Sr.ª Deputada ne'e hatudu documento ba Deputado sira.

...hakerek iha-ne'e, assinatura, sé-sé mak assina completo iha-ne'e, depois lori bá e haree filafali.

Sr. Primeiro-Ministro (Kay Rala Xanana Gusmão): — Ha'u pronto!

Sr.ª Maria Anabela Sávio (FRETILIN): — Depois ha'u entrega.

Tuirfali, baseia ba IX Governo Constitucional, haree liu ba desenvolvimento rural iha 6.6 husi Programa versão tetun, «Implementa plano desenvolvimento comunitário», husu explica to'ok ninia diferença ne'e iha-ne'ebé. Continua implementa infraestrutura rural ka sasán foun? Ida ne'ebé mak loos? Ida-ne'e precisa explicação.

E tuirfali, programa ida-ne'e dehan atu revê no reformula programa MDGs (*Millennium Development Goals*) iha página número 53, versão tetun, ninia sentido ne'e oinsá? Ida-ne'e precisa explicação. Karik atu continua programa MDGs uluk ne'e ka oinsá? Atu halo sira-nia uma ka reabilitação? Ida-ne'e precisa explica didi'ak. Será que ida-ne'e continuidade husi Uma Naroman ba Povo ka halo uma seluk? Tanba objetivo ne'ebé tau iha Programa ida-ne'e hanesan de'it ho objetivo husi Uma Naroman ba Povo.

E Excelência, atu taka, tuir ha'u-nia hanoin, di'ak liu ita haree lai saida mak uluk ita halo sala, halo avaliação bá, do que hatudu liman ba malu no buka ema seluk nia sala sem razão ne'ebé forte. Bele halo tan *audit* foun mós di'ak hotu, naran katak labele impõe ba tribunal sira ba interesse política nian.

Obrigado, hamutuk ita bele hodi combate corrupção e mai ita lori naroman ba povo.

Obrigado barak.

Protesto husi Deputado sira Bancada CNRT nian balu.

Sr.ª Maria Anabela Sávio (FRETILIN): — Ne'e U (*urusan*).

Hakilar husi Deputado balu.

Sr.ª Presidente: — Srs, Deputados, distintos Deputados, se bele, labele ita hanesan labarik!

Ha'u husu favor, dadeer ita mai ho memória fresca atu hanoin povo ne'e ita atu lori ba ne'ebé. Molok atu continua, ha'u iha ponto de ordem ida.

Sr. Deputado Patrocínio Fernandes.

Sr. Patrocínio Fernandes dos Reis (CNRT): — Obrigado.

Bom dia ba Presidente no componente Mesa, bom dia ba Excelência Sr. Primeiro-Ministro ho elenco governamental tomak, bom dia ba público tomak.

Ha'u foti ponto de ordem atu sugere de'it ba Mesa. Depois de acompanha tiha ritmo debate começa horisehik, dadeer-saan ne'e ita-nia ritmo ne'e mós depois la'ó hanesan ne'e, ha'u kaer kedas ba ponto de ordem ne'ebé mai husi Bancada FRETILIN hodi sugere ba Mesa. Tanba ita-nia debate ida-ne'e ba Programa, documento político ida, ita la iha sentido atu alarga to'ó loron tolu mós nafatin ritmo ne'e la'ó hanesan ne'e, e ita mós hatene katak ba Governo horas ida ka rua de'it ne'e importante para bele resolve problema sira ne'ebé mak hein hela. Então, ha'u sugere ba Mesa, ita kaer ba ida-ne'ebá, iha mós afirmação sira kona-ba apoio ba Programa husi bancada de oposição sira, no sentido katak tanba ita bele debate to'ó aban, la iha espaço ba Deputado ida atubele corrige ka hadi'a fali Programa ida-ne'e, ita iha buat rua de'it: ou ba rejeição, ou ba fó voto confiança ba Governo. Então, ne'e mak ha'u sugere ba Mesa, se bele karik ita hanoin buka mecanismo ida di'ak para, em vez de ita alarga to'ó aban, ita bele termina kedas ohin tanba ritmo debate ne'e ita sei continua bá-mai ida-ne'e de'it. Ne'e mak ha'u sugere, kaer ba ponto de ordem ohin Bancada FRETILIN nian, karik bele ita la'ó bá para ita bele haree didi'ak, para ita bele acelera lailais ba Programa ida-ne'e.

Obrigado.

Sr.^a Presidente: — Muitíssimo obrigada, Sr. Deputado Patrocínio, mas ha'u sei soe ba bancadas parlamentares no fim do dia de hoje. Tanba ita dehan ohin mós ita continua, ne'ebe ha'u sei fó ba Presidente das bancadas orsida, la'ós agora.

Tuirmai, iha tan pedido ponto de ordem. Deputada Olinda Guterres.

Sr.^a Olinda Guterres (KHUNTO): — Bom dia ba Ita-Boot, Sr.^a Presidente Parlamento Nacional. Sr. Primeiro-Ministro ho membro Governo tomak, ha'u-nia bom dia ba Ita-Boot sira hotu.

Sr.^a Presidente Parlamento Nacional, ha'u hanoin, ba bancada do Governo la precisa fó tempo ba sira ko'alia, fó tempo ba oposição ko'alia, tanba ita mak kaer Governo, ita mak bancada do Governo, ita lalika *komen-komen* tan para acelera debate ne'e lailais. Ita bancada do Governo, ita mak ko'alia troca malu, troca malu, ha'u hanoin, ladún furak. E ne'e hanesan ita troca fali, ita halo fali pergunta ba ita-nia Maun, ne'e ladún furak ida! Ha'u mós uluk bancada do Governo, ne'ebe Ita-Boot mak iha-ne'ebá gere, gere horas, Ita-Boot mak gere. Ami bele haree ba iha-ne'ebá, maibé Ita-Boot mak gere. Bancada do Governo, *stop!*

Obrigado.

Sr.^a **Presidente**: — Ho respeito tomak, Sr.^a Deputada, mas ha'u mós tem que fó bainhira sira iha ponto de ordem, tanba ita-nia Regimento fó-dalan.

Iha tan ida, ha'u espera katak este é o último. Sr.^a Deputada Bisoi, ponto de ordem, um minuto.

Sr.^a **Maria Rosa da Câmara «Bisoi»** (CNRT): — Obrigada.

Bom dia ba ita hotu.

Presidente, ita hotu haree husi lei, Regimento, bele gere iha Parlamento Nacional ne'e. Tanba saida? Ida-ne'ebé ko'alia fora husi assunto ne'ebé daudauk ne'e, Ita-Boot bele taka hanesan uluk Deputado Aniceto tuur iha-ne'ebá taka ba CNRT ne'e.

Ida fali, uluk la fó tempo ba oposição ko'alia, Deputado do Governo mak ko'alia, ne'ebe Ita-Boot sei iha memória ne'ebé di'ak hela, fresco hela, atubele gere buat ida-ne'e.

Obrigada.

Sr.^a **Presidente**: — Obrigada, Sr.^a Deputada.

Desde que intervenção ne'e pacífica, ha'u la iha problemas. Ita hotu iha-ne'e bele ko'alia, maibé pacificamente, está bem?

Ha'u hanoin, ohin ha'u hatete último, ne'ebe Sr. Deputado Gabriel, ho respeito tomak, ha'u fó ba intervenções. Orsida sei iha tan ha'u fó, tanba na'in-tolu ona mak ko'alia.

Tuirmai, Sr. Deputado Antoninho Bianco.

Sr. **Antoninho Bianco** (FRETILIN): — Obrigado.

Agradece ba Ida-ne'ebé mak fó moris mai ita, agradece mós ba herói no mártir sira ne'ebé husik hela RDTL mai ita. Ha'u-nia respeito ba Presidente Parlamento Nacional no Mesa, ha'u-nia respeito mós ba Primeiro-Ministro ho Vice na'in-rua, no membro sira hotu, ne'ebé iha 47, ha'u-nia respeito mós ba maluk Deputado e Deputada sira hotu no ex-titular sira-ne'ebé karik acompanha iha ida-idak nia fatin, povo maubere no buibere iha-ne'ebé de'it, iha rai-laran no mós rai-li'ur, ne'ebé acompanha karik, ha'u-nia respeito ba sira hotu, técnico sira-ne'ebé acompanha iha sala laran ne'e no mós iha li'ur, karik bele acompanha. Tanba ohin lora rua Bancada FRETILIN hato'o nia hanoin, apreciação ba Programa ida-ne'e, maibé ita hatene katak qualquer Governo sa'e tinan lima-lima, balu to'o, balu la to'o, é para halo programa ruma atu serbí Rai no Estado ne'e. Ne'e dinâmica democracia ne'ebé hatudu liuhosi sistema, ne'ebé ita rasik harii iha Constituição no lei ne'ebé cria. Então, sistema mak orienta ita desde Restauração mai to'o ohin, lora rua ita halo discussão, ne'ebe ne'e maka ita dehan buat hotu sei la'o tuir princípio, sistema Estado ne'ebé harii tuir regra sira.

Liga ba Programa ne'ebé composto husi 161 páginas, liga fali ho discurso Sua Excelência Primeiro-Ministro nian 18 páginas, ha'u haree, ha'u rona, ha'u avalia, conteúdo hirak ne'ebé hanesan,

bele dehan, buat balun ha'u temi iha-ne'e. Hira-ne'e hotu hanesan expressão husi ita-nia jornada moris RDTL nian to'o mai ohin lora, ne'ebe, ita hotu iha-ne'e hanesan sasin, e lição ne'ebé ita rasik halo e dala ruma mós ita sente hodi ita halo buat ruma ba ita-nia Nação atu lori Nação ne'e ba futuro ne'ebé karik di'ak liu.

Relaciona ho VI Legislatura no IX Governo nia Programa ne'ebé iha, ha'u atu hato'o ponto balu tuirmai: primeiro, aprecia tanba IX Governo apresenta Programa ne'e dentro corredor Constituição, artigo 108.º, alínea 1) no 2). Então, ita bele dehan programa ne'e mai tuir tempo ne'ebé estipula iha Constituição, artigo 108.º, n.º 1) no 2). Conteúdo Programa, ne'ebé husi isin ida página 161 programa ne'e rasik, no mós liga ba intervenção Sua Excelência Primeiro-Ministro nian, ha'u bele dehan, compromisso ne'ebé político, iha tempo badak mós dehan serviço todan ba Governo, 120 dias, iha fulan 12 mós volume serviço ida tem que maka'as, ne'ebe compromisso político ida, ita bele dehan, la'ós ambicioso, maibé todan ba 47 membro Governo ne'ebé agora haknaar an atu la'o durante tinan lima nian.

Ho ida-ne'e, ha'u dehan, conteúdo ne'e balu que mai laho dados, tanba ne'e mak ha'u husi Primeiro-Ministro orienta mós ita-nia membro Governo sira balu, balu kleur ona, balu tuan, tanba precisa mós ho dados tanba Programa mai tem que hatudu ho dados e dados mak orienta ita atu bá loos ne'ebé. Ha'u haree bá setor barabarak mai temi de'it atu halo ida-ne'e, halo ida-ne'e, halo ida-ne'e, maibé la hatudu ninia dados certeza. Maibé, ne'e la'ós Primeiro-Ministro mak sala, ne'e tanba mai husi membro Governo ida-idak ne'ebé atu hala'o ninia knaar iha setor ne'ebé sira simu, dehan pronto atu hala'o ona. Tanba ne'e, bele karik ha'u cita buat balu iha-ne'e.

Se ita temi agricultura, ko'alia kona-ba to'os ho natar nian, pecuário, pesca, floresta no seluk-seluk karik, ita dehan agricultura ne'e potencialidade Timor-Leste ne'e natar ne'e hira, e horas ne'e aproveita ona hira, e ema loloos atu halo natar ne'e iha ka lae, e produção tanbasá maka la bele iha, ne'ebe pelo menos apresenta dados ruma que bele convence e ba oin ne'e atu halo halo nu'usá, ne'e para bele ba oin ne'e tem que halo mak ida-ne'e. Nune'e mós iha parte sira seluk ne'ebé ita bele apresenta dados. Então, ita tama bá iha situação hanesan ne'e, maibé depois tinan ida, tinan rua, tinan tolu mai oin ne'e ita hatene katak halo buat ruma, ita produz, ita hakore an husi dependência ba produção rai seluk nian. Ida-ne'e mak ita dehan ita atu halo buat ruma que atu tulun ba Rai ne'e, tulun ba povo ne'e e kore an husi dependência.

Tanba ne'e, iha parte ida-ne'e ha'u hanesan recomenda de'it ou fó-hanoin de'it. Por exemplo, ita atu halo área floresta, floresta ne'e saida loos mak ita atu kuda, saida mak ita halo tiha ona, saida mak seidauk halo, saida mak bele, para valor económico ne'e aban-bainrua bele halakon mós dependência husi mina no seluk-seluk. Nune'e, setor barabarak ne'ebé ha'u haree, compromisso membro Governo barak, maibé la apresenta ho dados, então hanesan ha'u dehan: dados ne'e iha ka lae? Ou membro Governo balu sei halo adaptação? Se adaptação, la bele kleur tanba Primeiro-

Ministro dehan, adaptação ne'e 120 dias ne'e halo nu'usá, depois de 12 meses ne'e halo nu'usá, ne'ebe ita haree, ho ida-ne'e hanesan fó de'it hanoin, katak halo nu'usá mak bele iha desenvolvimento iha setor sira-ne'e bele di'ak.

Tuirmai, atu mós fó hanoin katak iha mós parte atu hala'o oinsá maka reforma iha lei balu, bele! Maibé se bele mós buat balu ne'ebé liga ba competência exclusiva Governo nian, ami la bele temi. Maibé, buat balu ne'ebé liga ba keta serviço hamutuk iha Parlamento karik, se bele karik rona mós ami-nia lian para ita bele dehan, ita harii, balu ita tem que hametin, balu ita haburas, balu ita hadi'a, e balu mak ita bele dehan buat foun ruma ou hadi'a e halo ho seluk. Ne'ebe, ita iha princípio ida-ne'e para hanoin katak ita-nia maluk sira-ne'ebé durante ne'e apoia Governo sira uluk sira-ne'e, karik labele halo buat ne'ebé nafatin de'it hodi halo ida-ne'e, bele mós ita tama katak ita keta mal gasto karik, então iha parte ida-ne'e ita bele haree. Ha'u fó exemplo de'it, cita buat balubalu kona-ba atu reforma lei sira-ne'e, bele! Maibé ita tem que rona malu para bele halo buat ne'e di'ak liután ba oin.

Ne'ebe, iha parte ne'e ha'u temi, por exemplo, uluk ho unanimidade ita halo lei ida RAEOA (Região Administrativa Especial de Oe-Cusse Ambeno) nian ho ZEESM (Zona Especial de Economia Social de Mercado), ne'ebé autor rasik maka Primeiro-Ministro hotu, atual, no mós ex-Primeiro-Ministro uluk, ne'ebé Ita-Boot sira, ita iha consenso ida para halo sasán sira-ne'e. Câmara de Contas mós hanesan ne'e, no lei seluk-seluk, maibé ne'e liga ba questão ne'ebé iha Parlamento, ita sei rona malu atu halo nu'usá mak di'ak liu ba oin. Ne'ebé ita atu hadi'a, ita hadi'a! Ita bele hametin, para bele assegura Estado ne'e ba oin.

Ha'u hanoin, Primeiro-Ministro, Partido FRETILIN aprecia no fó hanoin katak Governo ninia programa ne'ebé mai ne'e, ida ohin iha página 161 ne'e, bele hala'o, naran katak hala'o ne'e labele halo ema balu de'it maka bele hetan benefício, maibé ba povo tomak, husi parte norte to'o sul, oeste to'o leste, ita hotu bele hetan benefício hotu. Mesmo que programa balu ne'ebé uluk VIII Governo hala'o, ohin loron la considera karik, hanesan Cesta Básica ha'u bele dehan, ne'e iha relação mós ho atrai confiança povo nian oinsá mak bele produz, produz no produz, e depois maka husi parte Estado bele intervém, e nune'e ita bele dehan aproveitamento terreno ne'ebé abandonado bele produz e depois mós aproveitamento para ita mós bele kore an husi dependência ba produção ne'ebé mai husi li'ur. Ha'u haree husi programa ne'e la iha ona, maibé ha'u hein katak forma seluk bele atrai ita-nia povo sira bele aproveita terreno ne'ebé abandonado, bele produz tan, nune'e ita bele hakore an husi dependência demasiada ba importação, produção husi li'ur.

Ha'u hanoin, ida-ne'e ho hanoin barabarak ne'ebé ha'u atu temi hotu-hotu, ikusmai ha'u hatete: tem que valoriza malu de'it! Governo ne'ebé uluk halo buat balu ne'ebé di'ak, ita valoriza! Inclui VIII Governo ne'ebé liu daudaun, FRETILIN viabiliza. Buat di'ak ne'ebé iha, ita valoriza! Nune'e mós Governo sira anterior, e depois ita hatutan buat ne'ebé di'ak. Buat balu ne'ebé precisa hadi'a, ita tem

que hadi'a! Ita haburas duni sistema ita-nian ne'ebé ita harii, hametin Estado ne'e hodi bele fó moris hakmatek ba povo, desenvolve ita-nia Rai ne'e ba oin.

Tanba ne'e, ikusmai ha'u hatete nune'e: tempo to'o ona halakon ódio no vingança ba malu husi geração ba geração, mai ita haburas justiça ne'ebé lori paz no hakmatek ba povo no Rai ne'e, hodi desenvolve ita-nia Rai, valoriza ita-nia herói no líder sira hotu no mós povo sira tomak!

Ha'u-nia intervenção mak ne'e, dala ida tan, bom trabalho ba Governo ida-ne'e, e hein katak serbisu mai bele hametin ita-nia unidade ba povo, hodi hatudu ba mundo katak Timor-Leste bele.

Obrigado.

Sr.^a **Presidente**: — Muito obrigada, Sr. Deputado.

Tuirmai, Sr. Deputado Armando Lopes.

Sr. **Armando dos Santos Lopes** (PD): — Obrigado ba tempo e obrigado ba Sr.^a Presidente do Parlamento Nacional.

Sua Excelência Primeiro-Ministro, Vice-Primeiros-Ministros, distintas e distintos Deputados, Srs. membros Governo, ba rona rona-na'in sira-ne'ebé agora sintoniza hela iha Rádio Parlamento Nacional, ha'u-nia respeito.

Timor-Leste nian ukun an iha ona tinan ruanulu-resin-ida. Durante ukun an, ita reconhece katak iha ona infraestrutura básica, enquadramentos legais lubuk no política pública lubuk ne'ebé iha relação ho economia, social, educação, saúde no sira seluk-seluk tan, ne'ebé husi I Governo Constitucional to'o VIII Governo apresenta mai Parlamento Nacional, no, Parlamento Nacional, la'o tuir nia knaar nu'udar Constituição haruka, politicamente autoriza no aprova ona. Maibé ita hotu hatene katak povo Timor-Leste, iha nia ukun an ne'e mós, barak sei moris iha precariedade nia laran.

Governo troca malu no ida agora Governo Dasiak, ne'ebé ita hotu bolu coligação CNRT ho PD, no Legislatura daneen ona. Ita balu sai ona Deputado fila-fila, balu membro Executivo mai husi membro Legislativo e ita-nia partido mós kaer Governo fila-fila, dala ruma ita sai oposição, dala ruma bá kaer Governo. Ita hotu nia produto mós seidauk significativo, ótimo, ba garantia bem-estar ba povo ka fó moris di'ak ba povo. Nação ida-ne'e mós ita tau naran República Democrática de Timor-Leste, ho nune'e horas to'o ona atu ita tem que to'o áreas remotas, tem que hatene no dehan katak desenvolvimento recursos humanos iha áreas remotas labele iha fali kotuk no labele sai mukit hela de'it.

Tempo ona atu política ba *quantity* no qualidade educação tama iha áreas remotas, suco, posto no município – harii Nação husi base – tanba iha fatin remota hirak-ne'e mós existe sementes de seres humanos inteligentes. Mas, se la iha, ita iha obrigação hodi cria condição atu nune'e população iha áreas remotas mós bele sai matenek no na'in ba desenvolvimento ida-ne'e. Ne'e duni, plano husi base

temi ona iha programa IX Governo Constitucional, ha'u louva e agradece wa'in tebes. Maibé, precisa menciona balu ne'ebé considera importante no chave determinante ba prestação qualidade hodi produz recurso de qualidade, hanesan tuirmai: Carreira docentes ka professores tem que loke espaço para professor sira mós bele eleva sira-nia grau no escalão, liuhusi sira ida-idak nia designação; qualidade ka resultado serviço sai determinante, sai professor sénior ho digno; salário professor permanente precisa aumenta, la'ós tanba folin sasán sa'e, maibé fó motivação hodi sira foca de'it ba knaar hanorin no pesquisa hodi buka qualidade contínua; diretores escolares ne'ebé ita fó confiança, precisa trata sira ho digno no diferente ho professor subordinado sira, la'ós depende fali ba número aluno; número professor iha ensino secundário geral ho rácio alunos 35 por sala, iha ensino secundário geral balu, bele dehan, liu ona. Atu soluciona ida-ne'e, bele constrói alojamento ho digno ba professor transferência husi fatin ida ba fatin seluk, ka fatin escola ne'ebé precisa; necessário atu estabelece *standar* nacional ba *management* administrativo ida-ne'ebé uniforme no coadjuva atu abrange escolas filiais, iha estabilidade integrado ensino básico no nível secundário; trata ona reforma ba professor ne'ebé tama ona idade reforma, tanba fisicamente no psicologicamente la eficaz ona atu halo nia knaar hanesan manorin; calendário escolar precisa adota calendário rai-li'ur atu nune'e facilita estudante sira-ne'ebé finaliza nia estudo iha rai-laran bele continua nia estudo no mesmo ano.

Excelência Primeiro-Ministro, contente tebetebes no mós agradece wa'in dala ida tan ba IX Governo ne'ebé lidera husi Primeiro-Ministro, Maun Boot Kay Rala Xanana Gusmão, tanba iha ona política «Harii Nação husi base», menciona iha programa IX Governo, atu lori ensino pré-escolar, ensino básico, ensino secundário no ensino secundário técnico vocacional ne'ebé ho qualidade hakbesik ba povo iha áreas remotas.

Iha mós iha instituto politécnico, hanesan Politécnico Turismo no Hospitalidade iha Lospalos, ne'ebé Maun nia programa husi Plano Estratégia Desenvolvimento Nacional 2011 iha IV Governo Constitucional, ohin ita liu ona V, VI, VII no VIII Governo, no agora to'o ona iha IX Governo Constitucional, ho haraik an husu favor boot atu programa ne'ebé traça ona labele sai programa de'it, maibé precisa comprometido hodi estabelece duni instituto politécnico refere iha município Lautém iha mandato ida-ne'e, tanba ida-ne'e prova hodi lori educação ba besik povo iha áreas remotas no garante desenvolvimento setor educação ne'ebé equilibrado, forma graduados iha área específica no ho qualidade hodi apoia desenvolvimento setor turismo iha Timor-Leste.

Receita husi setor turismo iha Timor-Leste ne'e setor alternativo di'ak liu hodi kore ita husi Fundo Mina-rai. Maibé, la'ós ida-ne'e de'it, ita mós promove redução risco aglomeração população iha capital Díli no mós promove aumenta movimento social e amizade entre jovem sira husi município seluk ba município Lautém.

Maun Boot, ha'u rona husi intelektual Lautém oan sira dehan katak «Ami fera ona vidro, ami sai ona husi ne'ebá, mas ami kbiit la iha no la to'o. Husu Maun Boot, nu'udar Chefe Governo, atu hakbiit ami no halo tan história husi Lautém ba timoroan tomak».

Sua Excelência Primeiro-Ministro, Timor-Leste nia ukun an iha ona tinan ruanulu-resin-ida. Durante ukun an ita reconhece katak buat barak ne'ebé sei problema iha relação ba educação, ho tempo ida-ne'e ha'u hakarak ilustra educação Timor-Leste ho nia condição iha terreno.

Construção educativa tempo Indonésia rai ba ita usa quase tinan tolunulu liu ona, condição uma hirak-ne'e mós sai ameaça ba vida aluno sira-nian. Pacote referendo oferece husi Maun Boot iha tinan 2009, balu sei usa, ne'e mós ameaça hela ba conforto estudante sira-nian.

Distância entre escola no uma estudante sira-nian balu dook tebes, aluno sira hakur mota no balu hetan desastre no balu lakon ona iha sira-nia vida.

Escola seidak iha segurança confiável hodi previne ameaça *external* no no balu hetan ona agressão física husi ema li'ur ne'ebé tama ba escola laran.

Mestre sira hahú hanorin iha 1999 to'o a data, salário por mês por volta de trezentos e tal, ne'e insuficiente ba futuro ba sira-nia oan rasik.

Governo seidak fó apreciação ba professor sira-ne'ebé nu'udar formador de recursos humanos excelente iha Timor-Leste. «Ita sai excelente tanba mestre sira», lian professor sira.

Objetivo ka política merenda escolar atu hasa'e taxa participação no nutrição ba aluno sira, ne'e duni precisa fatin próprio ne'ebé saudável ho digno ba escola hotu-hotu.

Retroativo professor hahú pagamento iha tina 2018 liubá to'o agora seidak finaliza, halo mestre sira atu la iha fuan ba Ministério de Educação.

Atendimento ba necessidade professor iha município hotu-hotu dala barak lento tebetebes tanba orgânica serviço municipal educação la iha secção ka la iha departamento próprio atu tau-matan. Professor contratado sira-ne'ebé assina iha fulan-abril 2003, Governo atual iha dever, obrigatório, tem que halo pagamento tanba professor contratado mós através de procedimento vínculo jurídico balu iha Governo anterior.

Ida-ne'e mak ha'u hato'o.

Obrigado.

Sr.^a **Presidente**: — Muitíssimo obrigada, Sr. Deputado, bele taka tiha microfone.

Tuirmai, Sr. Deputado Óscar Lima.

Sr. **Óscar Lima** (FRETILIN): — Obrigado, Sr.^a Presidente do Parlamento Nacional.

Excelência, Sr.^a Presidente do Parlamento Nacional, composição da Mesa, colegas ilustres Deputadas e Deputados VI Legislatura, Excelência Sr. Primeiro-Ministro IX Governo Constitucional,

Vice-Primeiros-Ministros, membros do Governo, audiência no povo tomak, rona-na'in sira, iha primeiro de tudo, ha'u hakarak congratula S. Ex.^a Sr. Primeiro-Ministro ho membro Governo hotu bele apresenta Programa IX Governo nian, no furak, ita hotu-hotu rona tiha ona.

Bainhira ita halo leitura ba programa IX Governo nian ne'e, ha'u mai haree ba programa ida 3.1, kona-ba «Governação ba setor infraestrutura», iha ponto 5, no bele haree iha página número 56 versão tetun. Iha-ne'ebá dehan: «assegura eficiência, eficácia no transparência iha sistema de investimento ba infraestruturas no projetos boot nian, inclui procedimentos aprovisionamentos, gestão contratos no sistema de pagamento».

Refere ba ida-ne'e, ha'u hakarak hato'o katak kleur ona ita-nia maluk empresário timoroan sira halerik ho procedimento de pagamento ida-ne'e, ida-ne'e mak complicado tebes no naruk tebes ba iha situação de pagamento.

Ha'u hakarak hato'o de'it, ba iha situação ida-ne'e, katak sistema de pagamento ne'e sistema ida-ne'ebé complicado tebes, ha'u espera katak ita sei bele halo nu'usá mak atu halo menos para hanesan ne'e ita bele fó facilidade, ita bele haree empresário sira, selae burocrático demais, ita la bele halo buat ida.

Ita-Boot sira barak mós hatene katak ha'u mai husi *background* ida empresário, hasoru problema de pagamento ne'e ami rasik, enquanto seidauk mai hanesan Deputado iha Parlamento, mós enfrenta situação ida-ne'e. Companhia halo no hato'o pedido de pagamento ba diretor nacional, hafoin encaminha ba diretor distrital, husi ne'ebá haruka hikas filafali ba diretor nacional, hotu tiha mak hato'o ba ADN (Agência de Desenvolvimento Nacional), hodi halo verificação sai naruk no pagamento, antes de to'o iha Ministério das Finanças, naruk e naruk tebetebes. Ha'u hakarak hatete de'it katak antes de to'o iha ADN para ADN halo filafali nia verificação hodi haree dados ne'e loloos no atu halo inspeção, lori tempo quase fulan rua ka tolu. Ne'e problema ida que ita tem que buka atu halo nu'usá. Iha-ne'e ha'u hakarak hatete de'it, primeiro de tudo, ita tem que haree katak ita-nia empresário sira barak tebetebes seidauk iha capacidade financeira, sira barak mak sei foti osan husi crédito banco nian, tanba ne'e, quanto mais demora, durante fulan tolu ka haat, então ne'e ita prejudica ita-nia setor privado nacional, osan ne'ebé sira serbisu quase sei entrega hotu ba juros.

Iha *kredit* quase loroloron ita tem que selu, dala ruma procedimento sira-ne'e trava hela tanba de'it ba situação diretor sira balu bá licença, balu ba hetan consulta iha rai-li'ur, balu ne'ebé às vezes iha lia-mate lia-moris, e la fó delegação de poderes ba ema seluk. Às vezes buat balu que la bele duni, ha'u compreende, maibé ita tem que buka halo nu'usá mak atubele haree kona-ba situação ida-ne'e.

Iha-ne'e ha'u hakarak frisa totalmente ba iha Ministro das Obras Públicas. Senhor Ministro das Obras Públicas, Samuel Marçal, ema ida que kleur iha ADN hanesan Diretor-Geral iha-ne'ebá, ha'u espera katak, Ministro, Ita-Boot prepara ona atu fó resposta ba situação ida-ne'e, tanba situação ida-ne'e ha'u uluk sei hanesan Presidente Câmara de Comércio mós dala barak, de vez em quando,

encontro ho Sua Excelência ona. Ha'u espera katak Ita-Boot hanoin saida mak bele halo hodi fó resposta ba situação ida-ne'e tanba resposta ba situação ida-ne'e resposta ida que tem que halo tanba selae ita bele hamate filafali ita-nia setor privado nacional.

Iha-ne'e, ita haree, Senhor Ministro rasik la'ós mesak, maibé iha mós Vice-ministro ba Infraestrutura, Sr. Júlio do Carmo. Pronto, Ita-Boot sira hanesan colega iha Conselho de Ministro, se bele husu mós ba Sr. Júlio, hanesan Vice-Presidente, nia bele fó ninia hanoin tanba nia mós dala barak rona ona queixa sira-ne'e iha momento ne'ebé nia sei hanesan Vice-Presidente da Câmara de Comércio. Ha'u hanoin, ida-ne'e kleur ona.

Iha tan fali parte seluk, Ita-Boot sira iha Conselho de Ministros, bele hanoin mós experiência ne'ebé Sr. Gastão de Sousa, ne'ebé hanesan Sr. Ministro Investimento Estratégico, iha. Ha'u hanoin, nia mós iha experiência barak, bele troca de impressões hodi buka solução ba problema ida-ne'e.

Ida fali, ha'u hakarak ba fali iha situação ida hanesan iha BNCTL (Banco Nacional de Comércio de Timor-Leste). Governo, S. Ex.^a Sr. Primeiro-Ministro, – depois de haree iha-ne'ebá kona-ba BNCTL no Banco Desenvolvimento Timor-Leste – pergunta ha'u hakarak hato'o ba S. Ex.^a Vice-Primeiro-Ministro no Ministro Coordenador Assuntos Económicos, katak haree ba ida-ne'e ha'u contente rona tanba, hanesan timoroan, ha'u hatene katak ida-ne'e, se la'o, sei di'ak tebetebes. Maibé, Sr. Ministro, ha'u só hakarak hatete de'it: neste momento, BNCTL banco ida que bele fó apoio maka'as tebetebes ba ita-nia Nação, tanba ida-ne'e nia agora ritmo ne'e sa'e maka'as liu, nia mak agora número um iha Timor, ne'ebé injeta ba capital ou ba ita-nia finanças iha Timor-Leste, banco sira seluk quase que ladún fó. Tanba ida-ne'e, ha'u hakarak hatete iha ida-ne'e, uluk, Ministro Coordenador Assuntos Económico ida uluk hato'o tiha ona, capitaliza tiha ona mais ou menos 45 milhões ou 50 milhões de dólares americanos, ha'u espera katak agora ho ida-ne'e Sr. Ministro Coordenador dos Assuntos Económicos, Ita-Boot mai husi *background* ida que ho ha'u hanesan, empresário, favor ida haree to'ok ba situação ida-ne'e porque ita precisa tebetebes. Maun Boot quando iha ona hanoin ne'ebé di'ak, ha'u espera katak Ministro sira sei suporta total para hanesan ne'e bele haree to'o iha áreas rurais, hanesan Ita-Boot sira hakerek tiha ona iha livro ne'ebé Ita-Boot sira haree.

Ida tan fali, ha'u hakarak husu nafatin ba Ministro das Obras Públicas, Ita-Boot hanoin halo nu'usá mak bele haree kona-ba pré-qualificação ou Decreto-Lei n.º 17/2012, ne'ebé fó competência tomak ba Ministério das Obras Públicas halo pré-qualificação no Câmara de Comércio e Indústria de Timor-Leste hodi halo serbisu. Ida-ne'e halo barak ona, iha tiha ona decreto-lei, maibé to'o agora quase que ita la implementa, ne'e mak, favor ida, Sr. Ministro bele haree.

Hakarak hatete tan buat ida...

Sr.^a **Presidente:** — Bele conclui, Sr. Deputado?

Sr. **Óscar Lima** (FRETILIN): — ... Lailais de'it.

Investimento nacional barak liu do que investimento ne'ebé mai husi li'ur, ne'e hakarak hatete de'it katak, desculpa, timoroan sira investe barak liu do que ida mai husi li'ur. Dala barak liu ita halo lançamento de primeira pedra, primeira pedra, mas la fó benefícios e nunca inaugura iha ita-nia vida, ida-ne'e mak ha'u hakarak hatete. Tanba investimento ne'e, ha'u hakarak hatete de'it katak Câmara de Comércio e Industria Timor-Leste iha dados completo hodi bele justifica buat ne'ebé agora iha, tanba atual Presidente Câmara de Comércio iha dados ona hodi hatete katak timoroan barak liu mak investe, investimento labele haree de'it ida boot, maibé se bele ida-ne'ebé 100 mil dólares, 200 mil ou 300 mil dólares ou 400 mil dólares mós ita tem que fó oportunidade ne'e ba timoroan sira, tanba timoroan sira sempre iha vontade atu halo nu'usá mak bele desenvolve ita-nia Rain, tanba ita hotu mai ho hanoin ida de'it atu desenvolve timoroan, bele husi política ou husi empresário ou husi povo, ne'e mós ita hotu nian.

«Fiar an la'ó ba oin, ita hamutuk lori naroman ba povo».

Obrigado, Sr.^a Presidente.

Sr.^a **Presidente**: — Bele taka lai microfone, por favor!

Sr. **Óscar Lima** (FRETILIN): — Desculpa!

Sr.^a **Presidente**: — Sr. Deputado, Ita-Boot iha Comissão de Infraestruturas, mãos à obra! Bolu membro do Governo, discute regras ou regulamento ne'ebé la'ó la di'ak iha Comissão, tanba ita sei iha programa.

Tuirmai, Sr.^a Deputada Helena Martins.

Sr.^a **Helena Martins Belo** (FRETILIN): — Obrigado ba tempo.

Ha'u-nia respeito ba Presidente do Parlamento Nacional ho ninia composição da Mesa, ba colegas Deputados, ba S. Ex.^a Primeiro-Ministro no elenco governamental tomak, ba povo maubere no buibere ne'ebé acompanha debate ida-ne'e.

Ita tama ba lora rua debate ba programa ida-ne'e, em primeiro lugar ha'u-nia parabéns ba IX Governo Constitucional, ne'ebé liderado husi S. Ex.^a Primeiro-Ministro, Kay Rala Xanana Gusmão.

Iha lora daruak ne'e ita haree katak programa ne'ebé mai, iha nia introdução, primeiro, contraditório tebes, maibé horisehik Ita-Boot reconhece katak buka atu soluciona problema sira-ne'ebé la'ó, tanba ne'e ami agradece.

Iha exercício democrático, Governo ida troca malu ne'e normal, maibé Estado ne'e tem que iha nia continuidade. Programa Governo ida nian ne'e programa Estado nian no Nação nian. Qualquer

Governo apresenta nia programa atu hametin Estado, la'ós lori agenda pessoal ka competição entre líder ida ho líder seluk. Ida-ne'e iha Estado de direito democrático.

Excelência Presidente do Parlamento e Excelência Primeiro-Ministro, Constituição da República Democrática de Timor-Leste considera cuidado médico nu'udar direito fundamental cidadão hotu-hotu nian, impõe ba Governo atu estabelece sistema ida gratuito no, karik possível, descentralizado no participativo. IX Governo Constitucional simu posse iha 1 de julho de 2023, iha membro Governo tolu mak assume pasta iha setor saúde, importante, Ministra ida, Vice-Ministro rua, maibé ami ladún hatene orgânica do Governo, ne'ebe ami seidauk iha acesso ba. Maibé, ami haree ba tarefa sira-ne'ebé fahe, iha membro Governo na'in-tolu, ida Vice-Ministro Fortalecimento Institucional no ida Vice-Ministro Operacionalização Hospitais.

Iha IX Governo Constitucional iha Secretário Estado Fortalecimento institucional, maibé iha Ministério de Saúde iha mós Vice-Ministro Saúde Assunto Fortalecimento Institucional, oinsá coordenação serbisu ba assunto fortalecimento institucional, no em termos hierarquia ne'e oinsá? Realidade ida-ne'e hatudu de'it estrutura IX Governo sobreposto karik, tanba a verdadeira riqueza de uma nação é a força do seu povo, maibé estrutura ida-ne'e hatudu katak IX Governo hanoin de'it oinsá atu cura moras, la hanoin oinsá atu previne moras ba ita-nia povo nia saúde liuhusi proteção no promoção estilos de moris saudável ba oin.

Dados no metas ne'ebé usa atu elabora programa ne'e la atualizado. Compromisso eleitoral ida hatete atu harii hospital internacional ho andar 10, andar lima ba leten ba ema ne'ebé iha osan, andar lima mai kraik ba.... Ida-ne'e discriminação loos, maibé ami hakarak maka oinsá atu halo continuidade ba iha lançamento primeira pedra ba iha parte Hospital Nacional Guido Valadares.

Programa IX Governo lori de'it contraditório tanba VII e VIII Governo, dehan estagnado, maibé horisehik Ita-Boot reconhece katak ita sei hadi'a. Maibé, dados hatudu katak iha 2018 to'o 2022, mortalidade infantil ne'ebé iha total 319, tun ba iha 186; mortalidade inan isin-rua, iha dados 2018 to'o 2022, husi 27 pessoas tun ba iha 18; esperança de vida, ne'ebé iha 2017 ita iha 69 anos, agora sa'e ba iha 71 anos, ne'e sucesso ida maski buat ki'ik.

Indicador seluk, infraestruturas saúde nian, constrói facilidade saúde hamutuk 126, posto saúde foun 33, instala laboratório foun 10, instala fatin isolamento 15 no quarentena 10, harii hospital pediátrico rua ho unidade cuidados intensivos tolu no reabilita ida.

Excelência Presidente do Parlamento e Excelência Primeiro-Ministro, programa ida-ne'e mai ho política ida atu continua fó atenção ba combatentes, luta-na'in libertação ne'ebé Estado ida-ne'e atu cria fundo veteranos.

Iha VIII Governo Constitucional programa ida-ne'e cria ona no prevê osan um bilhão hodi cria fundo veteranos ida-ne'e, maibé agora daudauk programa mós atu tau filafali. Ha'u-nia pergunta mak ne'e: nia direito duni, maibé osan ne'e atu mai husi fundos ida-ne'ebé? Ka nafatin ita foti husi Fundo

Petróleo nian, hanesan horibainhira halo tiha ona, maibé ita-nia Presidente atual mak veta? Maibé significa katak fundo ida-ne'e importante, tanba ne'e mak Governo ida-ne'e tau filafali, ne'ebe ha'u agradece.

Iha programa ida-ne'e mós fó liu importância ba ema ne'ebé ho idade 70 anos ba leten, maibé haree mós katak iha situação ne'ebé ita enfrenta bainhira ita-nia Nação hasoru invasão, iha labarik ki'ikoan no jovem sira moris mós sai vítima ba ida-ne'e, tanba ne'e mak oinsá atu bele considera mós.

Iha programa ida-ne'e, ha'u haree iha livro página número 40 ba oin, iha 26 pontos ne'ebé importante atu recolha restos mortais, maibé la iha ida ne'ebé cita atu recolha ka buka tuir ita-nia saudoso sira-nia restos mortais, ne'ebé invasor sira lori lakon, hanesan ita-nia saudoso Nicolau Lobato, David Daitula, Mau Hudo Ran Kadalak, no mós husi massacre Lakudala, iha-ne'ebé ita-nia comandante boboot de'it, conhecido, hanesan Comandante Laikana, Comandante Ria no quase ema FRETILIN ne'ebé barak mate iha primeiro massacre ne'ebé acontece quando base de apoio tun mai. Tanba ida-ne'e mak, Ita-Boot, oportunidade ida-ne'e di'ak tebes, ami husu oinsá mak atu hola consideração ba ida-ne'e tanba tempo ne'ebé ita iha ba beibeik no ita-nia idade avança daudauk ona. Ida-ne'e ha'u-nia preocupação. La'ós ha'u-nia preocupação de'it, maibé povo tomak, no liuliu família ninia preocupação, to'o agora sei lamenta no husu babeibeik oinsá atu resolve.

Iha mós programa balu ne'ebé ita atinge, iha-ne'ebé husi 2018 to'o tinan 2022 Combatentes da Libertação Nacional hetan condecoração hamutuk 628, sira ne'ebé hetan ona direito hamutuk 28.471. Sira-ne'ebé iha prestação pecuniária única hamutuk 90, no sira ne'ebé desmobilizado 24 anos hamutuk 133 mak hetan ona osan ho valor 40 mil atu hari sira-nia uma iha território nacional.

Tuirmai, ha'u reforça nafatin iha área educação ninian, oinsá mak ita haree kona-ba bem-estar professor sira-nian atu halo investimento ida ne'ebé di'ak, sustentável, no desenvolve língua ne'ebé sai identidade ba ita-nia país ida-ne'e. Selae, hanesan horisehik Ita-Boot hatete, português ne'e sai fali *tetunguês* e agora ladún iha nia desenvolvimento tanba ita prepara didi'ak ita-nia futuro mak aban-bainrua sei sai líder ne'ebé sei substitui ita hotu, liuliu Ita-Boot.

Ikusliu, ha'u hakarak atu hatete katak fundo ne'ebé agora sustenta ita mak Fundo Petrolífero, único, tanba ne'e mak lia ne'ebé fó informação katak dada kadoras mai Timor-Leste ne'e indiscutível e ami-nia hakarak, durante tinan lima ne'e, halo esforço para tem que mai. Ne'e husi Ita-Boot mak, hanesan Primeiro-Ministro, buka esforço para oinsá atu dada duni kadoras iha tinan lima ida-ne'e mai. Ami hakarak nafatin fó ami-nia crítica construtiva atu hadi'a gestão iha Timor laran tomak no hamenos corrupção ba oin.

Obrigado ba tempo.

Sr.^a **Presidente:** — Muito obrigada.

Sr.^a Deputada, Fundo dos Veteranos la'ós Presidente mak hatete inconstitucional mas foi o tribunal, ne'ebe, hapara kedas iha momento da execução.

Molok atu ba oin, iha ponto de ordem ida.

Sr. Deputado Deker.

Sr. **Domingos Augusto «Deker»** (CNRT): — Obrigado ba oportunidade.

Respeito ba Presidente Parlamento Nacional, distintos no distintas Deputado sira, Sua Excelência Senhor Primeiro-Ministro ho membro Governo sira hotu no rona-na'in sira.

Ha'u la ko'alia liafuan barak, atu intervém de'it, ponto de ordem, clarifica de'it iha-ne'e husu ba distintos no distintas Deputado sira hotu no público tomak atu hatene kona-ba Fundos Veteranos no Fundos ba Veteranos ka atu hatene conteúdo rua ne'ebé la hanesan, iha ida-idak nia fatin.

Primeiro, ita ko'alia kona-ba Fundo Veteranos, ne'e katak fundo ne'e veteranos nian, fundo ne'ebé veteranos rasik mak cria ho nia osan. Segundo, ita ko'alia kona-ba Fundo ba Veteranos. Buat rua ne'e la hanesan. Ne'ebe, ita só discute de'it kona-ba Fundo ba Veteranos ne'ebé VIII Governo tenta tau, mas la tuir nia dalan no fim veta husi Presidente da República. E, ita ko'alia kona-ba Fundo Veteranos, ne'e fundo ida mai husi veterano sira rasik mak cria, ohin lora ita ko'alia programa kona-ba desenvolvimento ba fundo ida-ne'e rasik hodi bele sustenta veteranos nia geração tuirmai, nia oan no bei-oan sira.

Obrigado.

Sr.^a **Presidente**: — Muito obrigada.

Deputado Deker ba explicou saida mak ohin iha livro, ne'ebe ita refere fali ba livro.

Tuirmai, Sr.^a Deputada Mariquita Soares.

Sr.^a **Mariquita Soares** (FRETILIN): — Obrigado ba oportunidade, Sua Excelência Presidente Parlamento Nacional.

Sua Excelência Primeiro-Ministro, Sua Excelência Vice-Primeiros-Ministros, ilustres Deputados no membro do Governo sira hotu e povo doben Timor-Leste, iha biban ida-ne'e ha'u aprecia esforço Excelência Primeiro-Ministro no elenco governamental hodi prepara programa mandato ida-ne'e nian. Ha'u lê documentos políticos ne'e compreende hodi nota katak estrutura Programa Governo Constitucional IX hatudu momoos la reflete quadro lógico ka hierarquia causa efeito tanba kahur malu entre visão, objetivos, metas no indicadores de desempenho. Programa ida-ne'e la consegue apresenta visão saida mak atu atinge iha tinan lima mai no estrutura programa rasik hatudu Governo ida-ne'e la fó continuidade ba governação sira anterior.

Excelência Senhor Primeiro-Ministro, programa ida-ne'e, ne'ebé ohin Ita-Boot lori mai, hanesan mós programa ne'ebé Governo VIII lori mai iha Uma-Fukun ne'e iha tinan lima ba kotuk. Maibé, ha'u lê ho cuidado tebes to'o remata, ha'u deteta katak programa hirak ne'e la menciona progresso di'ak sira ne'ebé alcança ona no precisa hatutan liután, no ida-ne'ebé la di'ak hodi hadi'a iha tinan lima ne'e. Quase programa sira-ne'e, ne'ebé apresenta mai, ho tendência ignora totalmente esforço vontade política no mós resultado importante sira ne'ebé beneficia ka fó satisfação ba ita-nia povo doben ida-ne'e. Ha'u mós la haree, hafoin tinan sanulu implementação PED 2011-2030, iha ka lae mudança ba visão plano estratégico?

Excelência Senhor Primeiro-Ministro no colega Deputado sira, linguagem iha programa ida-ne'e nian hatudu momoos katak iha tinan lima nia laran Governo ida-ne'e sei la cria buat foun ruma tanba liafuan sira ne'ebé hanesan «revê, continua, reforça, melhora, conclui» hatudu katak buat ruma iha ona mak Governo ida-ne'e fó continuidade. Tanba ha'u nota katak liafuan sira hanesan «iniciar, criar, desenvolver» uitoan liu, ne'e katak sei la hamosu buat foun ruma iha tinan liman ne'e. Ha'u prefere hanesan ne'e duni, tanba ne'e Estado nu'udar construção integrado, inclusivo, sustentável, ne'ebé necessita continuidade.

Ha'u mós hakarak husu ba Sua Excelência Sr. Primeiro-Ministro: cenário saida mak di'ak liu ka ideal hodi atinge visão prazo médio no naruk? Tanba cenário ne'ebé descreve iha página número 8 aborda de'it kona-ba situação atual, maibé la fó opção ideal hodi alcança visão ne'e rasik.

Excelência Senhor Primeiro-Ministro, hanesan Excelência Primeiro-Ministro rasik hato'o ona iha campanha eleição liubá, katak Plano Estratégico Desenvolvimento 2011-2030 implementa ona durante tinan 10 no ita reconhece katak precisa hadi'a buat barak, nune'e avaliador independente ba implementação tinan 10 PED 2011-2030 relata katak maioria husi metas iha PED ne'e geral no la iha hierarquia causa efeito, tanba ne'e mak recomenda hodi halo reajustamento ba PED ne'e.

Excelência, tanbasá mak programa refere mai repete filafali de'it programa uluk ne'ebé continua geral no susar ba entidades relevante hodi implementa? Ha'u diretamente haree mós programa específico balu, hanesan educação, ne'ebé complexo tebes, complexidade ida-ne'e la'ós acontece iha tinan tolu ikus Governo VIII, maibé questão complexidade mai kedas ona husi uluk Governo IV, V no VI nu'udar corrente ligado, ligação ida to'o ohin lora. Iha programa balu educação nian ne'ebé bele implementa no sukat ne'ebé barak liu mak husi programa sira-ne'e geral liu no susar atu sukat. Exemplo, hanesan programa reforça condição no ensino secundário hodi hetan conhecimento científico, humanístico no técnico, programa ida-ne'e no barak tan mak la racionaliza, maibé geral liu.

Excelência Senhor Primeiro-Ministro, iha área educação nian ha'u harak husu: saida mak objetivo educação nian atu atinge iha tinan lima ne'e? Ha'u nota katak iha objetivo educação nian kahur entre metas no indicador, la define loloos nia objetivo.

Iha ensino pré-escolar nian, iha página número 16, ponto 2, *kurikulum* ida oinsá mak IX Governo hakarak atu implementa iha ensino pré-escolar?

Infraestrutura no facilidade, iha página número 17, ponto 2, «Constrói no reabilita escola ensino pré-escolar máximo 100, completa ho recursos humanos, equipamento no material didático». Baseia ba saida mak IX Governo sei constrói no reabilita mínimo escola 100? No sei constrói iha-ne'ebé, posto ka suco? Número manorin hira mak IX Governo planeia atu hetan formação no hasa'e qualificação mínima iha tinan lima nia laran no hira mak formado ona? Atu husu: iha ensino básico, iha página número 17, alínea 1), hatete katak «Aumenta ba 95% taxa líquida iha matrícula», baseia ba cálculo saida mak hodi hetan taxa líquida matrícula 95% iha tinan liman nia laran?

Iha página número 17, alínea 3) hatete katak «Hamenos rácio alunos iha sala laran ba média nacional professor ida ba alunos 35, liuhusi construção pelo menos sala foun 1050». Ha'u-nia pergunta: tuir padrão internacional, professor ida alunos 25 atu melhora qualidade iha recursos humanos ba ensino básico nian, maibé tanbasá mak IX Governo nia programa hatete professor ida ba alunos 35? Sá qualidade recursos humanos mak ensino básico atu hetan?

Atu hakotu ha'u-nia intervenção, ha'u hakarak hatete, documento PED resultado 2011-2030 ne'ebé aprova ona ho resolução do Governo n.º 28/23, de 31 de maio, nu'udar documento de Estado nian, la'ós documento VIII Governo nian ka partido ida nian, halo ho sentido de Estado atu serbí povo no nação Timor-Leste, Livro mak ida-ne'e!

Sr.ª Deputada ne'e hi'it livro hodi hatudu.

Tanbasá mak seidak lê hodi hatene didi'ak ninia conteúdo, maibé ignora tiha de'it? Ida-ne'e sentido de Estado ka? Tansá mak la utiliza de'it PED reajustado 2023-2038 hodi lori ba iha aprovação ho lei nune'e bele implementa?

Excelência Senhor Primeiro-Ministro, ha'u hein katak Ita-Boot sei iha vontade ba Ita-Boot nia mehi ba ajustamento Plano de Estratégico de Desenvolvimento nian.

«Hamutuk ita bele!»

Muito obrigada.

Sr.ª **Presidente:** — Srs. Deputados, harii iha-ne'ebé ne'e orsida iha plano anual, ne'e mak orçamento tau ba ne'ebé hodi haree executa ka lae, selae ita tama sala.

Ha'u iha ponto de ordem rua, mas Sr.ª Deputada Helena ha'u la fó tanba Deputado Deker ohin responde Ita-Boot nia preocupação.

Mas, sei iha ida, Sr.ª Deputada Maria Angélica Rangel. Um minuto, Sr.ª Deputada.

Sr.^a **Maria Angélica Rangel da Cruz dos Reis** (FRETILIN): — Muito obrigada, Sr.^a Presidente.

Ha'u atu husu de'it, ohin ko'alia kona-ba Fundo Veteranos, ha'u, durante tinan barak foti kona-ba Fundo Veteranos ne'ebé ko'a direta 30 dólar ne'e ba iha beneficiário, ha'u sempre foti iha-ne'e. Ha'u hakarak hatene: base legal saida mak Conselho Veterano ko'a ami-nia osan?

Ha'u foti exemplo de'it, ha'u-nia companheiro, camarada Mau Laku ne'ebé mate, nia iha oan na'in-haat. Depois de ko'a tiha, halo tiha redução, 270 dólares ne'e hela de'it 240 dólares nia fahe ba nia oan na'in-haat ne'e nia atu simu hira? E, preocupação ha'u-nian mak ne'e, ko'a beneficiário veteranos nia osan 30 dólares ne'e base legal mak saida? Se base legal ne'e iha decreto-lei ruma ou lei ruma, tem que fó hatene ba beneficiário, tanba durante ne'e ha'u mós sai beneficiário ida, ko'a ha'u-nia osan, ha'u la hatene ko'a hira ona mak iha-ne'ebá. Agora, se ha'u mak hanesan na'in, ha'u hanesan dono do investimento iha Fundo Veterano, ha'u tem que hatene quais são os investimentos que fundo ne'e halo ona. Ha'u tem que hatene, tanba ha'u mós sai hanesan beneficiário ba iha 30 dólares ne'ebé fulan-fulan ko'a, ha'u-nia osan. Ida-ne'e mak ita-nia problema.

Tanba ne'e, ami-nia intervenção husi bancada oposição husu atu esclarece mai ami tanba ida-ne'e mak ita hakarak hadi'a, ida-ne'e mak ita hakarak hadi'a! Maibé, Fundo Veteranos, ha'u concorda ho Sr.^a Presidente, katak ne'e Tribunal mak declara inconstitucional. Ha'u hakarak esclarece ida-ne'e de'it para ita hotu esclarecido, tanba Fundo Veteranos ko'a 30 dólares ne'e ha'u mak sempre foti iha-ne'e.

Muito obrigada.

Sr.^a **Presidente**: — Obrigado, Sr. Primeiro-Ministro, talvez orsida bele fó ba Ministro competente atu responde ba assunto ida-ne'e.

Tuirmai, iha Deputada Maria Teresa Gusmão.

Sr.^a **Maria Teresa da Silva Gusmão** (PD): — «Kaer metin ukun-rasik an, harii Nação husi base».

Ha'u-nia respeita ba Presidente Parlamento Nacional no composição da Mesa, Sr. Primeiro-Ministro, no Ministros no Vice-Ministros tomak, Deputado, Deputada, povo Timor Lorosa'e.

Uluknanain ha'u husu desculpa, ha'u la iha intenção atu sukut, maibé ha'u hakarak fahe de'it ha'u-nia reflexão ida kona-ba participação iha debate horisehik to'o ohin loron.

Kona-ba *claim* «Programa IX Governo ne'e totalmente mai husi Programa VII no VIII Governo», ha'u atu dehan de'it, atu sustenta ema nia moris, mai husi de'it rai, tasi, foho no bee, questão de'it mak oinsá gere natureza ne'e sai matéria prima, secundária e terciária ba ema nia moris.

Saida mak sai sasukat atu diferencia programa sira-ne'e? Será que muda fatuk sai ba pão? Osan-mean sai fali ikan? Ou maná tun husi lalehan? Ou fera fatuk bee suli sai mai?

Atu Governo sé de'it mak sai, nia la sees husi programa ne'ebé cita daudaun. Loloos questiona mak qualidades e quantidades cada setor no melhora liután iha era digitalização no *milenial* ida-ne'e.

Loloos ita la halo julgamento sé mak sala, sé mak hahú uluk, maibé ho fuan boot reconhece, ida-ne'e mak ita-nia problema, ita-nia realidade. «*Saida mak ita kuda, ida-ne'e mak ita ku'u*».

Espera IX Governo lidera husi Maun-Boot Kay Rala Xanana Gusmão hahú ona e começa daudaun ona kuda fini di'ak, nune'e ku'u resultado ne'ebé di'ak mós ba geração tuirmai. La fácil, maibé iha vontade no *commitment*. Sucesso, desafio e obstáculo ne'e relativo, maibé ha'u fiar katak história hatudu ona, cada pessoa, grupo, iha geração ida sei mosu atu halo mudança. Mudança ida-ne'e mak povo hein e tau esperança iha era *milenial* ida-ne'e, bainhira Maun Boot Kay Rala Xanana Gusmão mosu fali iha palco político Timor-Leste no mundo, no garante kedas confiança de votos 31 cadeiras.

Maun Boot Kay Rala Xanana Gusmão halo política nu'udar adversário no oposição iha nível alto ho objetivo ho povo, iha povo no ba povo hodi hametin *fondasi* Estado de direito democrático. Maibé, iha povo nia leet, Maun Boot Xanana hatudu an humano tebetebes ho ferik-katuas, labarik inus-been sira, jovem desesperado, to'o na'in la hakribi, la discrimina, iha tahu laran, fo'er laran. Liuliu iha pandemia COVID-19, povo lakon esperança ho terror COVID-19, Maun Boot presente atu garante de'it katak «Hakmatek hela ho imi!», durante tinan lima kotuk maski la kaer ukun, hodi hamosu tiha mito ida-ne'ebé dehan «Xanana mak povo, povo mak Xanana». Balu dehan ne'e MPO (*menarik perhatian orang*) de'it, lae! Ida-ne'e carisma, ida-ne'e vocação tanba ema hotu la halo ida-ne'e, ha'u no ita ne'ebé ohin ne'e mós la *mampu* halo ida-ne'e.

Maibé, ida-ne'e importante liu, naha boot ida-ne'ebé povo tau iha Maun Boot Xanana nia kabaas mak hodi hadau tiha Ita-Boot nia privacidade, goza no fó an tomak, tempo, matenek tomak atu dada kadoras mai Timor-Leste, hakotu ona assunto fronteira marítima, aérea, terrestre ho Indonésia. Ida-ne'e mak povo nia raan, povo nia iis moris, mak Maun Boot la consegue hakotu ida-ne'e, molok haksumik an husi palco político, sei tau hela de'it política sofrimento rohan laek ba geração tuirmai. Povo husu ho matenek tomak ba assunto ida-ne'e atu Maun Boot bele trata durante tinan lima nia laran ba oin.

Husu nafatin bancada oposição atu nafatin sai hanesan oposição construtiva, basá ai-baluk iha matan laran precisa ema seluk atu hasai ai-baluk ne'e, ema seluk sai espelho ba ita atu fihir an. Husu atu sai controlo social ne'ebé fó crítica, sugestões construtivas no eficaz, no ida-ne'e Presidente Parlamento Nacional cessante, Doutor Aniceto Guterres, halo ona compromisso iha início da legislativa.

Tuirmai, maski programa claro, maibé Deputados no membros do Governo de'it mak lê, nune'e, ha'u hakarak secunda de'it Programa IX Governo balu iha Plenária ne'e atu povo rona ho tilun rasik. IX Governo cumpre duni promessas eleitorais ho povo, maski IX Governo la bele hatún lalehan iha rai no halo milagre iha tinan lima ne'e nia laran.

Tinan lima ne'e nia laran PD aprecia IX Governo nia programa nu'udar PD nia compromisso mós:

1. IX Governo sei continua ka lae resolve assunto cesta básica ba 48. 920 pessoas ne'ebé seidak simu cesta básica? Suco Lauala, Ermera tomak seidak simu. 17 aldeias Metiaut seidak simu, Suco Alaua Leten, Lavateri, Baguia, Baucau mós seidak simu, maski chefe suco rasik rejeita.

2. Ida-ne'e importante tebetebes ba MSS (Ministério da Solidariedade Social), iha página número 34, ponto 2 e 3, kona-ba segurança social, to'o ohin loron funcionário sira la hatene oinsá, bainhira, iha-ne'ebé, base legal saida, porcento hira, direito oinsá, sistema oinsá atu acesso ba segurança social. Será que fulan-fulan ko'a osan, maibé to'o agora la hatene paradeiro, oinsá? To'o na'in mate ona mós osan mós mate lakon tuir hotu.

3. Sugere ba Ministro Coordenador Assunto Desenvolvimento Rural e Habitação Comunitária, iha página número 53, ponto 6, atu tinan lima nia laran ne'e consegue ona executa plano urbanização hodi harii habitação comunitária ou bolu naran *perumahan*, completo ho escola, centro saúde, mercado, campo desporto, ba população ne'ebé la bele sosa rai no la iha espaço atu halo uma iha Díli ka iha capital, e fulan-fulan sei reembolsa fali ba Estado custo uma nian. Nune'e de'it, tanba to'o ona tempo atu buat hotu-hotu la'ós atu gratuito, exceto ba sira-ne'ebé vulnerável liu.

4. Nafatin ba MSS, página número 37, ponto 10, sugere to'ok modelo foun sanção ba violência doméstica no abuso ba labarik sira, atu violento sira labele lori ba Becora maibé lori ba Laclubar, Hospital Saúde Mental, para violento sira sente experiência tanis, hamnasa mesak, ema duni, basa, sente ta'uk ne'e oinsá.

Ba nafatin MSS, página número 38, ponto 3, harii *panti jompo* ba ferik-katuas sira-ne'ebé ita haree iha *facebook* barabarak tebes, hela de'it iha barraca oan ida, fatuk-kuak, ai-hun boot, para sira bele hetan domin no atenção e mate ho digno. Prefere setor privado ka ema rico sira iha Timor haree ida-ne'e nu'udar caridade e *peluang business*, sai mós emprego ba ema hotu.

Tuirmai, página número 46, husu atu estabelece sistema digital *online* ba tratamento documentos hanesan bilhete de identidade, cartão eleitoral, passaporte, certidão de nascimento RDTL no documentos seluk tan para evita forma hanesan dadur, hahú husi tuku 1 kalan boot to'o fali lokraik.

Tuirmai, página número 75, iha âmbito promove economia azul, ami sugere bele halo parceria ho FTTL (Força Trabalho Timor-Leste), atu acelera capacitação ba jovem sira. Sira preparado, maibé precisa hatama sira iha sistema nia laran.

5. Ba Ministério Agricultura e Pescas, página número 8, ponto 30, investe iha produção ai-fuan, Timor seidak to'o iha bolu naran: «*empat sehat lima sempurna*». Alimentação kuran tebetebes, nune'e hamosu moras oioin, sugere Governo prepara fini ai-fuan fahe ba cada família tem que kuda ai-fuan *minimal* variedade tolu ou haat nune'e.

Sr.^a **Presidente**: — Bele conclui, Sr.^a Deputada.

Sr.^a **Maria Teresa da Silva Gusmão** (PD): — Página número 85, ponto 2, sugere harii lailais posto Polícia Marítima ho equipamento suficiente atu assegura katak ema estrangeiro la mai na'ok Timor nia ikan. Povo haree ho matan, kaer ho liman, maibé la bele halo buat ida, tanba limitações ha'u temi iha leten.

Ikusliu, iha conceito construção de Estado de direito democrático, transformação geração continuador hodi harii no hametin Estado de direito democrático, la iha *wajah baru* no mós la iha *wajah lama*, iha de'it mak líder *panutan* ida nu'udar liman sorin aman, liman sorin inan atu iha dever moral no política total, preocupa ba nia povo no Nação bainhira sira haksumik an husi palco político no taka matan rohan laek iha loron ida, hodi lori povo sai husi kiak no mukit ba terra prometida, «Liberta pátria, liberto povo».

Excelência Primeiro-Ministro, Maun Boot Kay Rala Xanana Gusmão, hela única Ita-Boot de'it, Ita-Boot ikus iha tinan lima ne'e nia laran, povo Timor 1.318.445 população tau esperança ba terra prometida. Se la hahú ohin harii filafali huun ida, abut ida, povo ida Timor-Leste ida de'it, então conceito ukun rasik-an hela *fatamorgana* de'it.

Sr.^a **Presidente**: — Obrigada, Sr.^a Deputada.

Sr.^a **Maria Teresa da Silva Gusmão** (PD): — Esperança no responsabilidade tau confiança tomak ba Ita-Boot nia kabaas.

«Bá ó, maubere oan pronto atu serbí», hamutuk ita bele halo mudança lori Timor ba mundo.
Obrigada.

Sr.^a **Presidente**: — Muito obrigada, Sr.^a Deputada.
Tuirmai, Sr. Deputado António Clau.

Sr. **António Moniz Calau** (FRETILIN): — Di'ak, obrigado ba oportunidade.

Ha'u-nia respeito ba Sua Excelência Presidente Parlamento Nacional e composição da Mesa, Sua Excelência Primeiro-Ministro IX Governo Constitucional e membro Governo sira hotu, distintos

e distintas Deputados, povo doben maubere no buibere sira hotu iha li'ur ka iha Nação laran, maluk convidado sira hotu e mídia, bom dia.

Dahuluk, hakarak hato'o parabéns ba povo doben nação Timor-Leste, ne'ebé fó ona legitimidade ba partido CNRT liuhusi eleição iha 21 de maio de 2023. Parabéns mós ba Sr. Primeiro-Ministro ho nia estrutura IX Governo Constitucional ne'ebé simu posse iha dia 1 de julho de 2023. Aprecia mós Sr. Primeiro-Ministro ho membro sira hotu, ne'ebé halo esforço durante semana ida hodi finaliza programa IX Governo nian, hodi lori lailais mai Uma-Fukun ida-ne'e atu debate no haree.

FRETILIN hanesan oposição ida-ne'ebé hakarak fó hanoïn di'ak atubele fó tempo ba IX Governo atu ukun to'o tinan lima, hodi bele responde ba necessidade povo nian tuir promessa ne'ebé halo ona iha campanha política no iha laron tomada de posse nian, nune'e ha'u hakarak ko'alia kona-ba Programa IX Governo Constitucional ninian iha página número 125, kona-ba administração pública nian.

Loos duni, ita hotu hatene katak administração pública mak sai hanesan parte ida importante tebes ba funcionamento Estado nian. Governo ida atu ukun ho di'ak, administração pública ida tem que forte hodi assegura máquina Estado la'o ho di'ak, eficácia no eficiência.

Administração pública nia base legal mak Lei n.º 7/2009, lei ida-ne'e mós hamosu husi IV Governo Constitucional, ne'ebé liderado husi Sua Excelência Primeiro-Ministro, Sr. José Alexandre Xanana Gusmão. Agora, ba halo reforma tan ba administração pública hodi moderniza papel administração iha tempo badak, ha'u-nia perguntas: erro saida mak IX Governo identifica hodi hakarak halo reforma ba administração pública? Tipo modernização saida mak IX Governo ne'e atu usa? Tebes katak durante Governo hotu-hotu ne'ebé ukun, administração pública la la'o normal? Sasukat saida mak IX Governo Constitucional usa hodi identifica katak precisa reforma administração pública hodi bele halo serbisu ho qualidade e garante saida?

Iha mós dia 16 de fevereiro de 2016, iha VI Governo Constitucional nia tempo, hamosu resolução Governo nian kona-ba harii Comissão Reforma Administração Pública ho nia missão atu desenvolve política pública ida ne'ebé di'ak liu ba funcionamento Estado.

FRETILIN reconhece VIII Governo Constitucional ne'e Sr. Primeiro-Ministro atual ninian governação duni. Agora daudaun ita iha ona IX Governo Constitucional, ita continua ko'alia kona-ba reforma administração pública, tan ne'e hamosu dúvidas mai ha'u hodi hakarak husu perguntas: governação dala hira ne'e metas saida mak ita hetan ona husi reforma administração pública ne'e? Benefício hira mak sente no simu ona nu'udar resultado husi reforma ne'e rasik? No iha área saida de'it mak, depois de reforma administração pública ne'e, hetan crescimento ida-ne'ebé di'ak hodi fó moris di'ak ba ita-nia povo iha Nação ida-ne'e? Se metas ne'e atinge ona, pelo menos to'o por cento hira?

Ha'u haree mós iha Programa ida-ne'e sei estabelece Agência ba Reforma no Modernização Administração Pública, será que ho existência Comissão Função Pública nian la to'o? Tanba ita hatene katak iha IX Governo Constitucional hamosu mós Vice-Ministro Fortalecimento Institucional hodi trata ba assunto administração pública.

Tuir posição bancada oposição ninian, ne'ebé horiseik Presidente da Bancada FRETILIN, camarada Aniceto Guterres, reafirma ona katak hakarak IX Governo ukun to'o tinan lima, labele monu iha dalan klaran, maibé hanesan bancada oposição e halo knaar hanesan fiscalizador, mak ami sei hakilar maka'as e dehan sai ba povo katak buat ne'ebé loos ami dehan loos e buat ne'ebé sala ami dehan sala, hodi nune'e hadi'a ita-nia Nação la'o ba oin. Ho nune'e mak ami, bancada oposição, la'ós crítica de'it e husu de'it perguntas, maibé fó mós hanoin ruma ba Sua Excelência Senhor Primeiro-Ministro atu considera hodi tau mós iha programa IX Governo Constitucional ninian.

Iha oportunidade ida-ne'e, atan-ha'u mós hakarak ko'alia uitoan kona-ba funcionários públicos, agente administração pública e funcionário casual sira. Ita hotu hatene katak funcionários permanentes e funcionários agentes administração existe ho base legal artigo 3.º, Estatuto Função Pública ninian. Sira-ne'e mak halo knaar iha administração pública sira, Governo ida tun Governo ida sa'e mak nafatin de'it, sira hanesan trabalhador hodi hala'o serbisu Estado nian hodi garante serbisu hotu iha administração pública bele la'o ho eficiência ho eficácia hodi atinge metas tuir plano no programa governação ida nian durante tinan lima. Maibé, atan-oan sira-ne'e nia direito ba salário la to'o hodi sustenta sira-nia moris loroloron nian, bikan laran mamuk hela tanba salário oan sira simu fulan-fulan ne'e gasta ba hahán bikan tolu ba loron ida nian, gasta ba lia-mate no lia-moris, gasta mós ba oan sira-nia necessidade escola nian no ba buat seluk tan.

Ha'u, hanesan tilun ho matan hodi hatutan hela halerik lian-laek sira-nian ba Sua Excelência Primeiro-Ministro IX Governo Constitucional atu tau mós iha consideração ba halerik sira-ne'e. Ha'u hatene condição sira-nian tanba atan-ha'u mós mai husi ne'ebá.

Ha'u recomenda mós ba Sua Excelência Primeiro-Ministro atu haree filafali *test* promoção grau, ne'ebé ita aplica tiha ona ba ita-nia funcionário público sira iha tinan rua ka tolu ba kotuk. Ami haree katak ita tem que tau iha consideração ita-nia maluk sira ne'ebé dasa rai, ita-nia maluk sira iha canalização bee moos, ita-nia maluk sira ne'ebé serbisu iha eletricidade, merece ka lae sira ba tuur iha computador nia oin hodi tuir promoção ida-ne'e? Ha'u husu ba Sua Excelência Primeiro-Ministro atu tau mós iha consideração e fó prioridade ba sira.

Ha'u reconhece katak ita tama ona iha mundo globalização e Função Pública hakarak atu promove, moderniza instituição, maibé, haree ba condição *real*, ita-nia funcionário sira seidauk to'o iha-ne'ebá.

Tuirmai, ha'u hato'o mós halerik funcionário casual sira ne'ebé sai vítima ba Governo ida tun Governo ida sa'e. Ida-ne'e sai ona cultura ba atos governação sira, ita haree, ho *kasar* karik, ita dehan política *balas dendam* ...

Sr.^a **Presidente**: — Bele conclui, Sr. Deputado?

Sr. **António Moniz Calau** (FRETILIN): — ... mas ita haree ho di'ak, buat ida normal hela, ho razão ida-ne'ebé bele justifica katak Governo ida-ne'e mai ukun tem que lori nia ema serbisu atubele apoia nia Governo.

Tanba tempo, ha'u conclui de'it.

Ha'u convida ita hotu atu filafali ba mensagem furak ne'ebé horisehik Sua Excelência Primeiro-Ministro, Kay Rala Xanana Gusmão, fó hela mai ita: «Mai ita hotu hakuak causa nacional foun ida-ne'e! Mai hamutuk ita luta ba ita-nia Estado de direito democrático ho kilat ne'ebé naran vontade atu serbisu, ho kilat-musan husi participação ativa no construtiva ida di'ak, hamutuk ho hanoin no visão ida de'it kona-ba liberdade no desenvolvimento».

«Hamutuk ita bele, fiar an la'o ba oin».

Obrigado, Presidente.

Sr.^a **Presidente**: — Muito obrigada.

Sr. Deputado, ha'u hanoin, liga ho reforma administrativa, ha'u sugere lê relatório anual da Comissão Função Pública ne'ebé foin debate lailais iha Plenária ida-ne'e. Iha-ne'ebá *memang* o descontrolamento de recrutamento de funcionários casuais, la'ós ami mak ko'alia.

Iha ponto de ordem ida, Srs. Deputados, molok ita atu ba *break* ba *snack*.

Sr.^a Deputada Cedelízia Faria, ha'u husu um minuto, ba Ita-Boot.

Obrigada.

Sr.^a **Cedelízia Faria dos Santos** (CNRT): — Obrigada barak ba Sr.^a Presidente.

Ha'u-nia respeita ba Ita-Boot, ba Excelência Primeiro-Ministro, ba membro do Governo tomak no ba ita hotu.

Ha'u hakarak fó-hanoin uitoan ba Mesa mós tanba ha'u acompanha hela intervenção husi maioria Deputado sira, intervenção sira-ne'e quase la foco ona ba programa. Ita-Boot mós ohin ko'alia ona, tanba ne'e, ha'u hanoin, se ita soe tempo de'it ba intervenção sira-ne'ebé devia ita halo discussão bainhira iha ba OGE ou ita halo ita-nia plano ação anual, maibé tanba ko'alia hotu programa, di'ak liu ita avança de'it ona ba ita-nia guião número 13 hodi fó palavras ba líder bancada sira.

Ha'u fó hanoin ida-ne'e de'it, tanba ha'u nota mós iha Deputado balu ne'ebé assunto husi Câmara de Contas, tuir loloos canaliza ba Tribunal, maibé husu fali ba Governo mak atu halo filafali ba auditoria ba assunto sira-ne'e.

Ne'ebe, ha'u hanoin katak di'ak liu ita hakat de'it ona ba guião número 13, Sr.^a Presidente, se ita ba *break* agora. Ne'e ha'u fó-hanoin de'it.

Obrigado barak.

Sr.^a **Presidente**: — Muito obrigada ba sugestão.

Maibé, ha'u tenta gere ita-nia grelha ne'e to'o esgota tanba iha ita-nia guião claro tebetebes. Bainhira esgota, ha'u bele hapara ona e ita ba ponto 13, ne'ebé Ita-Boot refere.

Sr. Primeiro-Ministro, caros colegas Deputados, ita ba *break* 15 minutos, ita filafali mai, to'o tuku 1 ita sai ba almoço

Muitíssimo obrigada e bom *snack* para todos.

Sessão ne'e suspende iha tuku 10 liu minuto 57 no retoma fali iha tuku 11 liu minuto 28

Sr.^a **Presidente**: — Srs. Deputados, ho respeito tomak husu ba Ita-Boot sira hola fatin para ita continua ita-nia sessão plenária.

Srs. Deputados, iha registo iha-ne'e husi Bancada da FRETILIN. Como seidauk iha, ha'u fó liu ba ba Sr. Deputado Luís Roberto.

Sr. **Luís Roberto da Silva** (KHUNTO): — Obrigado, Sr.^a Presidente do Parlamento Nacional.

Bom dia ba Ita-Boot, ba membro da Mesa tomak. Bom dia mós ba Sua Excelência Primeiro-Ministro, ba Vice-Primeiro-Ministro sira no membro do Governo tomak, audiência tomak no ba povo doben Timor-Leste.

Ohin, segundo dia, ita halo discussão no debate kona-ba programa IX Governo ninian, husi Bancada KHUNTO ninian mak hatete katak importante mak ita foco ba iha programa tanba ita seidauk tama ba iha orçamento. Maibé programa ida-ne'e, quando ita halo leitura, karik ita halo apreciação ba ida-ne'e, katak buat hotu di'ak, ita bele avança, não é? Tanba ita ko'alia programa mak ita conta fali história ita bele sai dukur iha Parlamento. Sai dukur iha Parlamento e depois nia implementação mós de vez em quando sai dukur tiha hotu. Tanba ne'e mak, nu'udar geração foun, aprecia nafatin ba iha Sua Excelência Primeiro-Ministro nu'udar mós aman ba Nação ida-ne'e, aman ba Juventude Lorico Aaswa'in sira.

Hanesan horisehik ha'u-nia intervenção, ita Timor ne'e 21 anos restaura ita-nia independência, maibé infraestrutura básica sira hanesan bee moos, estrada, eletricidade seidauk alcança tanba saida?

Ita iha garantia ba ita-nia Fundo Mina-rai, ita hasai tiha ona osan bilhões ba bilhões, maibé até a data ita seidauk responde infraestrutura ne'ebé ita hotu nia hakarak.

Ne'ebe, ha'u aprecia ba Programa ida-ne'e, quando ita atu hadi'a sistema ruma iha *internal*, atu administração pública ka atu instituição sira ne'ebé ita precisa atu hadi'a, hadi'a duni! Tempo ida hanesan ne'e mak ita hatudu liman ba malu beibeik mak ita-nia desenvolvimento mós hakdasak nafatin tanba ita fiar katak atu implementa programa ida-ne'e, tinan efetivo atu implementa ida-ne'e *paling* tinan rua ou tinan tolu. Sistema Timor ne'e ita adapta tiha ona, tanba ne'e ha'u lakohi para ko'alia barak. Ema barak ko'alia hanesan ne'e: hakarak ko'alia uitoan, implementação ne'e barak. Povo nia exigência mak ida-ne'e, ne'ebe, aprecia nafatin ba Programa ida-ne'e, importante mak ha'u hakarak, hanesan Excelência Sr. Xanana horisehik ko'alia, ita pró-ativo ba Programa ida-ne'e. E ha'u foti lema ida dehan «*leave no one behind*», ida-ne'e importante ba ita hotu-hotu, halo nu'usá para ita participa iha Desenvolvimento ida-ne'e para bele alcança objetivo povo ne'e nian, rai ne'e nian e ita hotu-hotu nian, la'ós político ida-rua nian, selae mak ita conta história mak barak, história hamate desenvolvimento. História tau iha Museu ne'ebá para ita hotu estuda, valoriza, dignifica. Importante mak ita hotu-hotu halo reflexão ba ita-nia an, tanba saida mak 21 anos ita restaura ita-nia independência, mas infraestrutura básica la alcança? Tanba saida? Timor ida-ne'e la bele *dikuasai oleh* política, ha'u hakarak *menguasai* buat ida desenvolvimento nacional, ida-ne'e mak chave importante. Tanba ne'e, primeiro mak ita tem que ser cria estabilidade política, estabilidade governativa, tanba chave ba desenvolvimento mak paz no estabilidade. Ne'ebe, nu'udar representante povo sira-nian iha Parlamento Nacional, hanesan ami sira geração foun ne'e, conta história ne'e aminia iis la to'o ida. Ami geração foun ne'e, ami hanoin barak de'it mak ita ne'e ukun an tinan barak ona, mas ba bee moos mós ita-nia povo sei halerik, ba estrada mós sei halerik, ba eletricidade mós sei halerik, coitado!

Ne'ebe, ha'u aprecia wainhira ita halo mudança ida ba iha IX Governo ne'e atu cria boa governação, importante tebetebes. Halo mudança buat ruma ba iha Timor ida-ne'e! Hanesan administração pública, loos duni, ita precisa hadi'a. De vez em quando ita hatuur ema ne'ebé la loos, então saida mak nia atu halo? Ha'u foti referência ida hanesan iha Lei da Função Pública nian, ema ne'ebé tuur iha carreira profissional mais ou menos ne'e nível quatro ba leten, Diretor-Geral prisão nian, começa 2000 até a data sei tuur nafatin ho nível três, contra regulamento, contra mós Lei Função Pública. Ida-ne'e mak ita precisa atu hadi'a, reforma buat sira hanesan ne'e. La'ós reforma ema, mas gestão sira hanesan ne'e tem que hadi'a duni! Ne'ebe, ami, Bancada KHUNTO, firme nafatin *demi kepetingan Negara*. Ba interesse nacional Estado ida-ne'e nian, mai ita hotu-hotu halo reflexão para bele hadi'a ida-ne'e.

Ida-ne'e mak ha'u-nia intervenção badak, ha'u fiar katak, Presidente Parlamento ohin ko'alia tiha ona, e colega Deputada sira mós ohin ko'alia tiha ona, ohin Deputada Cedelízia foin ko'alia, ita

foco ba Programa ida-ne'e. Karik Programa ida-ne'e ladún furak, ita hadi'a! Ida-ne'e mak dehan katak «*leave no one behind*» ne'e. Se ita mai mak conta história para tuu liman ba malu, la tempo karik.

Ne'ebe, ha'u-nia intervenção badak mak hanesan ne'e, ha'u entrega filafali ba Excelência Sr.^a Presidente Parlamento Nacional.

Obrigado barak.

Sr.^a **Presidente**: — Tuirmai, Sr.^a Deputada Verónica Fernandes.

Sr.^a **Verónica Fernandes** (FRETILIN): — Obrigada ba tempo. Maibé, ha'u husu licença, retira.

Obrigada.

Sr.^a **Presidente**: — Obrigada, Sr.^a Deputada.

Tuirmai, Sr.^a Deputada Sancia Paixão Bano.

Sr.^a **Sancia Florência Paixão Bano** (FRETILIN): — Obrigada barak tempo.

Ha'u-nia boa tarde ba Sua Excelência Primeiro-Ministro, Presidente Parlamento Nacional, distintos Deputados ho membro Governo no mós ba povo rai doben Timor-Leste.

Ha'u iha assunto rua de'it kona-ba Programa Governo Constitucional, IX Governo ne'e.

Iha página número 50 ko'alia kona-ba comunicação social, ha'u atu husu pergunta de'it: instituto saida maka IX Governo atu halo? Será que Departamento Comunicação Social iha Universidade Nacional Timor Lorosa'e ne'e la'ós fó formação jornalista sira? Tanbasá mak la hadi'a no reforça de'it associação ka Conselho de Imprensa, maibé tem que harii instituição foun ne'ebe sei precisa gasto boot?

Segundo, kona-ba cultura no património, iha página número 44, iha-ne'e hatete katak estabelece centro cultural regional iha Oe-Cusse, Liquiçá, Ermera, Maliana, Ainaro no Suai, ha'u hakarak husu de'it: tanbasá saida mak hasai tiha Baucau ho Ataúro, ne'ebé tama ona iha PEDN (Plano Estratégico de Desenvolvimento Nacional) 2011-2030?

Ikusliu, ha'u hakarak clarifica iha-ne'e katak atual coordenadora timoroan ba projeto CAFE (Centro de Aprendizagem e Formação Escolar) simu ona carta demissão husi Sr.^a Ministra Educação, karik ami precisa atu husu clarificação ba assunto ida-ne'e.

Obrigada, Sr.^a Presidente Parlamento.

Sr.^a **Presidente**: — Obrigada, Sr.^a Deputada.

Tuirmai, Sr. Deputado Antonino Doutel.

Sr. **Antoninho Doutel Sarmento** (FRETILIN): — Obrigado ba Mesa.

Ha'u-nia ponto sira ne'ebé atu acrescenta iha momento ida-ne'e ha'u retira.

Obrigado.

Sr.^a **Presidente**: — Muito obrigado.

Tuirmai, Sr.^a Deputada Angelina Sarmento.

Sr.^a **Maria Angelina Lopes Sarmento** (PLP): — Muito obrigada pelo tempo, Sr.^a Presidente, bom dia.

Bom dia ba Srs. Membros da Mesa, ba Sr. Primeiro-Ministro e Vice-Primeiros-Ministros no membros do Governo tomak, ba distintas e distintos Deputados.

Ha'u-nia intervenção ida-ne'e atu continua husu tanba sei iha dúvida balu ne'ebé ha'u hakarak hato'o para hetan resposta ka clarificação ou explicação husi Sr. Primeiro-Ministro.

Ita consciente katak iha 2033 Timor-Leste sei hasoru precipício orçamental ka défice iha ita-nia Fundo Petrolífero, no ita-nia receitas ne'ebé mai husi Bayu Undan ne'e mak durante ne'e ita usa hodi sustenta hela Orçamento Geral do Estado, e Governo ida-ne'e, iha ninia programa, fó duni prioridade atu dada kadoras husi campo *Greater Sunrise* mai Timor-Leste. Maibé iha informação balu que uluk ita rona katak 2026 ita bele fa'an ona ita-nia mina husi campo *Greater Sunrise*. Será que mehi ida-ne'e bele sai realidade? E to'o agora, afinal ita seidauk iha estudo viabilidade técnico kona-ba kadoras mai Timor-Leste no kadoras atu mai karik precisa fundo boot atu halo investimento. Ami hakarak hatene, projeto *Greater Sunrise* ne'e estudo viabilidade husi ninia *life cycle* husi projeto ne'e iha ona ka lae? E la'ós estudo viabilidade ba projetos infraestruturas de'it, maibé ba projeto estudo de planos e investimentos, estudos do impacto ambiental no estudo ida-ne'e, se ita halo duni investimento, halo ho modalidade saida no financiamento ba investimento ne'e sei mai husi ne'ebé?

Iha 2019 Governo Timor-Leste investe ona 650 milhões hodi sosa participação husi *Royal Dutch Shell* no *ConocoPhillips* ba campo *Greater Sunrise*, no agora *Timor Gap* mak sai hanesan proprietário maioritário ho participação 56,56%, nune'e fó biban mai ita atu halo controlo maior ba desenvolvimento no gestão recurso. Maibé, haree husi IX Governo nia programa, fó prioridade atu halo reforma total ba *Timor Gap* no ANPM (Autoridade Nacional de Petróleo e Minerais), objetivo atu halo reforma mak saida enquanto *Timor Gap* iha papel boot atu halo andamento ba campo *Greater Sunrise*? E ida-ne'e verifica iha Programa IX Governo ne'ebé dehan katak ba estudo viabilidade, cooperação ho parceiro sira, ne'e *Timor Gap* sei continua iha papel boot.

Ko'alia kona-ba kadoras mai Timor-Leste, ne'e la'ós mehi organização ida nian ka grupo ida nian, e muito menos partido ida nian, no atu to'o iha-ne'ebá ita precisa consenso nacional, tanba wainhira kadoras mai duni, ita sei celebra dala ida tan Timor-Leste nia independência económica,

ne'ebé sai mós povo ida-ne'e nia mehi, ne'e duni ita precisa consenso nacional. Timor-Leste atu bá oin, ita hotu precisa fó liman balu hanesan saida mak Sr. Primeiro-Ministro salienta iha discurso horisehik, kona-ba «reafirmar o Estado de direito democrático». Ida-ne'e precisa ema hotu nia apoio.

Excelência Sr. Primeiro-Ministro, husi sorin seluk, durante ne'e saida loos mak sai fator impedimento ba ita hodi to'o ohin loron ita falha atu desenvolve ita-nia setor produtivo, hanesan agricultura, turismo, cooperativa no setor mineiro atu sai fontes alternativas ba receitas petrolíferas?

Política inovativa ida husi IX Governo mak atu projeta economia azul nu'udar setor produtivo ne'ebé bele atrai turista sira, tanba ita-nia tasi no riqueza marinha sira atraente tebes, mas, oinsá atu acelera setor ida-ne'e sai nu'udar campo de batalha foun atu intercala lailais iha período ida ne'ebé ita atu la'o hasoru precipício orçamental? Ami iha preocupação boot, tanba ho ritmo alocação orçamenta ne'ebé la suficiente ba setor hirak-ne'e, orçamento aloca de'it atu halo despesas, la'ós atu buka receitas. Hanesan Ministério Agricultura, Turismo, Comercio, cooperativas no recursos minerais, sira-ne'e ita tau osan atu dada tan osan, la'ós tau osan atu gasta de'it osan. Oinsá Governo sei colmata situação sira hanesan ne'e? Governo ida-ne'e nia programa balu hanoin atu fó continuidade ba setor economia alternativa, ami hakarak hatene uitoan kona-ba ne'e.

Parlamento Nacional, iha 2021, aprova autorização legislativa ba Governo, fó hikas competência ba Executivo atu define administração direta no indireta do Estado hodi cria instituto público no empresa pública, pelos vistos Programa no Orgânica do IX Governo ne'e atu lori fali administração indireta sira atu sai fali direção ida iha ministério nia laran, exemplo mak Bee Timor-Leste, E.P. no EDTL, E.P.. Instituição sira-ne'e hatudu ona sira-nia prestação hodi buka receitas do Estado no, depois sai empresa, receitas sa'e husi 35 milhões ba iha 48,36 milhões por ano ou colheita média cada fulan husi 2,6 milhões até 2,9 sa'e ba iha quatro milhões e tal cada fulan. IX Governo muda ida-ne'e ba direção, previsão receitas hira mak possivelmente sei hetan atu lori receitas ba Estado? Tanba prioridade Governo ida-ne'e nian mak atu halo promoção ba implementação melhoria colheita taxas atu hasa'e receitas domésticas, será que nakfilak ba direção oan ida sei bele melhora gestão ida-ne'e no bele duni contribui atu atinge programa gestão finanças publicas? Reforma gestão finanças públicas, atu muda ba direção ida, precisamente altera uluk lei tanba uluk Parlamento Nacional halo autorização legislativa haktuir ba Constituição RDTL, artigo 96.º, n.º 1. alínea d) no artigo 115.º, n.º 3. Maski Governo completo ona, maibé atu extingue empresa pública sira, nafatin tem que liuhosi lei. Ami husu explicação husi Governo.

Ligado ho setor agricultura, VIII Governo nia esforço mak produz ona foos ho nível produção ne'ebé di'ak. Hanesan dados, ha'u apresenta katak iha 2018 to'o 2022 produção nacional arroz aumenta husi 34,42% sa'e ba 73,34%, meta ida-ne'e ita alcança liu tiha meta ne'ebé estabelece iha tinan lima liubá. Iha IX Governo nia programa, iha página número 79, menciona katak «assegura katak Timor-Leste sei atinge 70% produção foos to'o 2028». Dados 2022 ne'e produção arroz liu tiha

ona 70%, alcança ona 73,34%, tuir loloos to’o 2028 produção aroz atu aumenta, la’ós mantém ou tun fali. La hatene, Ministério Agricultura kaer dados husi VIII Governo nian ka lae, tanba buat balu ita iha avanço di’ak ona, ami hein katak programa ida-ne’e buka netik dados atualizados husi saida mak ita alcança ona atu, pelo menos, iha conetividade husi governação ida ba governação seluk, liuliu atu halo política pública sira baseia ba evidencia ka *evidence-based policy*.

Ha'u hanoin, ida-ne'e mak ha'u hakarak hato'o e hein Sr. Ministro nia explicação.

Obrigada, Sr.^a Presidente.

Sr.^a **Presidente**: — Muita obrigada, Sr.^a Deputada.

Tuirmai, Sr.^a Deputada Lúcia Taeki.

Sr.^a **Lúcia Taeki** (CNRT): — Retira, Presidente. Obrigada.

Sr.^a **Presidente**: — Muita obrigada, pelos vistos ita hamlaha ona. ...

Hamnasa husi Sr.^a Presidente rasik.

... Tuirmai, Sr. Deputado Abel dos Santos.

Sr. **Abel dos Santos** (PLP): — Di’ak, primeiro, obrigado ba tempo.

La haluha mós bom dia ba Presidente Parlamento, Sr.^a Fernanda Lay, no mós la haluha bom dia ho respeito ba Primeiro-Ministro, Maun Boot Kay Rala Xanana Gusmão, ho mós membro do Governo tomak, e la haluha mós distinto e distinta sira hotu, ba mós mídia, rona-na’in sira hotu, povo doben Timor-Leste tomak ne’ebé agora daudauk acompanha hela ita-nia debate Programa IX Governo iha Uma-Fukun ida-ne’e.

Hanesan representante povo husi Partido Libertação Popular (PLP), primeiro hakarak fó apreciação ba IX Governo Constitucional nia Programa ne’ebé horisehik apresenta ona liuhosi Chefe do Governo, Maun Boot Kay Rala Xanana Gusmão, programa hirak-ne’e aposta ona tuir plano ba tinan lima governativa nian ba interesse nacional povo no rai doben Timor-Leste.

Excelência Primeiro-Ministro e membro do Governo sira hotu, preocupação tebes hanesan representante povo iha Uma-Fukun Parlamento Nacional, la’ós atu nonook no rona maibé baseia ba plano sustentabilidade desenvolvimento nacional, ita la precisa atu julga malu iha processo construção Estado de direito democrático ida-ne’e, maibé precisa consideração ba processo construção Estado ida ne’ebé hahú husi I Legislatura to’o V Legislatura, ohin preocupação mak povo no nação ida-ne’e nia moris di’ak. Husi programa ne’ebé VIII Governo halo la hotu tanba mandato mós remata, ida-ne’e la

sai sasukat, desafio boot, ba IX Governo atu continua desenvolve vários aspetos desenvolvimento infraestrutura, tanto físico no *non* físico, hanesan estrada, eletricidade, água e saneamento, educação, saúde, segurança no comércio e indústria. Seluk ne'ebé la temi, ho nune'e liga mós ba continuação IX Governo nia Programa hanesan política ba tinan lima mai, kona-ba execução programa tuir Proposta OGE, hakarak kaer filafali matadalan plano ba 2011-2030 ba sustentabilidade desenvolvimento nacional.

Excelência Primeiro-Ministro e membro Governo sira hotu, pensamento nacionalismo liuhosi unidade, ação e progresso hodi afirma programas governativas ne'ebé implementa iha anterior no atual, di'ak e iha progresso ba interesse nacional. Maski mai hanesan oposição, la significa lakohi apoia Programa IX Governo, maibé atu solicita ba Sua Excelência Chefe do Governo atu haree iha Ministério balu ne'ebé ami atu hato'o, hanesan Ministério Interior, Ministério Estatal, ba mós Ministério Solidariedade Social (MSS).

Haree ba parte Interior nian, precisa halo reforma ba agente nacional sira ne'ebé idade avançado, fó mós prioridade ba promoção divisa agente polícia tuir mérito; identifica no valoriza mós agentes ne'ebé durante tinan barak la iha promoção divisa; precisa aumenta quantidade polícia iha cada município no destaca mós iha linhas fronteiras.

Ba Estatal, atu husu para halo mós identificação ba funcionário sira, ne'ebé idade avançado tem que reforma, fó oportunidade ba jovem sira; reduz mós emprego no movimento jovem sira-nian, Governo tem que iha seriedade ba assunto emprego.

Ba mós Social, precisa atu iha continuidade ba programa subsídios ba idosos, mós bolsa da mãe, bolsa hakbiit no oan-kiak sira.

Ida, atu aumenta tan, ohin haluha tiha, kona-ba Interior nian, atu ko'alia mós ba proteção civil. Proteção Civil nu'udar instituição pública ida importante, ne'ebé mak tutela ba iha Ministério Interior, precisa prepara recursos humanos ida ne'ebé adequado hodi halo atendimento ida iha terreno ho profissional, responsabilidade, atu responde ba situação desastres naturais, karik acontece, no labele acontece tiha mak ita foin halo prevenção.

Ida-ne'e de'it mak apreciação ho recomendação.

Ikusliu, la iha inimigo ba Programa, maibé iha amigo ba sustentabilidade ho desenvolvimento nacional.

Obrigado.

Sr.^a **Presidente**: — Molok fó ba Sr. Deputado António Verdial, iha Sr. Deputado António da Conceição ne'ebé husu ponto de ordem. Faz favor.

Sr. **António da Conceição «Kaloan»** (PD): — Obrigado, Sr.^a Presidente.

Ha'u foti ponto de ordem atu fó hanoin de'it nafatin ba ita hotu katak debate ida-ne'e tende daudauk ona kona-ba debate Orçamento Geral Estado nian, ne'ebé ita ko'alia ona kona-ba receitas, ita ko'alia kona-ba programa sira ne'ebé saida, que ladún iha fatin iha debate atual. Tanba ne'e, karik ita esgotado, ita dehan de'it esgotado, ita la precisa estende tempo ba buat ne'ebé ita sei iha tempo atu ko'alia.

Obrigado.

Sr.^a **Presidente**: — Muito obrigada, Sr. Deputado.

Hela de'it ida, Sr. Deputado António Verdial.

Sr. **António Verdial de Sousa** (KHUNTO): — Muito obrigado, Sr.^a Presidente, pela segunda vez.

Ha'u atu tatoli de'it mensagem murak ba IX Governo Constitucional.

Relaciona ho Timor-Leste nia processo ba adesão Organização Mundial Comércio iha tinan kotuk, Governo anterior ho nia equipa técnica sira mai halo ona apresentação balu kona-ba processo adesão nian, iha ne'ebé Parlamento Nacional rasik mós hola parte hodi aprova legislação balu ba processo ida-ne'e, inclui lei ne'ebé importante, mak Lei N.º 14/2022 kona-ba Código do Direito de Autor e Diretos Conexos, de 21 de dezembro de 2022. Iha biban hirak-ne'e ha'u mós acompanha hela processo sira-ne'e hotu no, tuir informação ne'ebé ami hetan, Timor-Leste sei sai membro ba Organização Mundial Comércio iha tinan 2024. Nu'udar Deputado iha Legislatura liubá, hafoin de apresentação husi Governo anterior, Timor-Leste mós precisa adota legislação lubun boot ida, ne'ebé prevê iha plano ação legislativa Timor-Leste nian, processo adesão ba Organização Mundial Comércio ka OMK.

Tanba processo ne'e considera atu remata no fó tempo ne'ebé badak tebes, ha'u-nia mensagem importante, hanesan Deputado, ba IX Governo Constitucional atu hola consideração hanesan tuirmai ne'e:

Karik iha legislação balu ne'ebé tutela iha Parlamento Nacional nia competência, atan ha'u, nu'udar Deputado, sugere ba Governo atu informa no aproxima Parlamento Nacional atu ita hotu bele serbisu hamutuk hodi dudu processo ida-ne'e ba oin tuir roteiro indicativo adesão nian ne'ebé iha ona.

Tuirmai, ha'u cita uitoan ba Programa Governo nian, página número 138, iha letra *b*), hatete ho liafuan momoos katak «reforma ba quadro legal sei hala'o husi consolidação no harmonização ba quadro legal tomak iha sistema justiça no área direito nian», ha'u contente tebetebes.

Iha página número 139, iha liafuan dehan katak «sei implementa Lei de Terra», Lei de Terra mak lei n.º 13/2017, de 5 de junho 2017, kona-ba Regime Especial para a Definição da Titularidade

dos Bens Imóveis. E mós dehan katak atu finaliza levantamento cadastral no registo ba bens imóveis, ne'e questões técnicas, completa tiha pacote lei de terra no revê registo predial! Ha'u contente liután quando ita atu halo ka completa lei complementar atu nune'e bele tau Lei kona-ba Rai nian em marcha ho objetivo atu garante situação jurídica kona-ba rai ba iha cidadão Timor-Leste hodi hatán ba artigo 54.º da Constituição da República. Iha mós dehan, «propõe aprovação legislação nian ne'ebé ajuda hadi'a regime de gestão de bens imóveis Estado nian no arrendamento bens imóveis Estado nian, no arrendamento bens imóveis do Estado ba particular», iha biban ida-ne'e, ha'u atu hatete iha-ne'e katak ita iha lei, iha Decreto-Lei n.º 19/2004, no ita iha Lei n.º 5/2005.

Iha letra c), kona-ba desenvolvimento recursos humanos nian iha área justiça, especial iha-ne'e, hanesan Deputado ne'ebé iha experiência uitoan, hakarak tulun IX Governo Constitucional ba iha Secretaria de Estado de Terras e Propriedades kona-ba formação. Excelência Sr. Primeiro-Ministro, hanesan ema ne'ebé serbisu kleur iha área ne'e ha'u hatete, formação iha Secretaria de Estado de Terras e Propriedades ne'e crucial tebetebes, tanba durante ha'u-nia acompanhamento depois de atan ha'u tama tiha mai iha Parlamento hanesan Deputado, ha'u seidauk haree formação ida ne'ebé sustentável, especial liu ba formação kona-ba *land law*, *land registration*, *land use*, *land reform* ho hirak ne'ebé ema dehan katak precisa fó formação ne'ebé adequado, atu nune'e ita bele hetan funcionário ida ne'ebé iha capacidade hodi tau lei ne'e em marcha, hodi serbí ba instituição ida-ne'e. Ne'ebe, hanesan Deputado mós, ha'u ho hakraik an husu, karik bele IX Governo Constitucional hasa'e tan Secretaria de Estado de Terras e Propriedades ne'e ba instituição ida ne'ebé autónoma ho capacidade administrativa no financeira.

E hanesan Deputado mós, ha'u husu ba Excelência Secretário Estado atu keta haluha haree filafali ba oan sira ka alin sira ne'ebé uluk iha projeto Ita-nia Rai, ne'ebé hetan tulun orçamento husi povo americano, ita forma ema lubun wa'in iha território nacional, município hotu-hotu, nune'e mós Governo aloca orçamento ba SNC (Sistema Nacional de Cadastro), ita forma tan ita-nian ema timoroan. Mesmo que sira la'ós funcionário, maibé sira hetan ona formação no formação ida-ne'e ita usa recurso Estado nian, usa osan Estado nian. Ha'u hatene no compreende katak sira la'ós funcionário, maibé sira técnico sira ne'ebé Governo bele usa.

Ida-ne'e mak ha'u-nia mensagem, karik sala, ha'u husu desculpa. Maibé ida-ne'e mak ha'u-nia mensagem.

Muito obrigado, Sr.^a Presidente.

Sr.^a **Presidente**: — Muito obrigada, Sr. Deputado.

Esta é a última intervenção do último Deputado. Entretanto, ha'u sugere, Sr. Deputado como está na Comissão A, é matéria para seminário, faça um seminário e toda a gente participa para ter a sensibilidade sobre terras e propriedades.

Sr. Primeiro-Ministro, tempo Ita-Boot nian, mas ha'u iha opção rua: como foram 20 Deputados mak halo intervenção, se Governo precisar de tempo, ita bele *break* ba almoço, que devia ser a 1h00, mas ita agora 12h00, ita fila tuku 3:00 Sr. Primeiro-Ministro hatán, e depois vamos para o número 13 do Guião e ita decide. Pelos vistos está esgotado, Srs. Deputados, se permite ha'u atu hatete nune'e ou depois de Primeiro-Ministro hatán, ita sei iha. Ne'ebe, tanba 12h00 liu tiha ona, inscrição la iha tan, ita considera esgotado.

Sr. Primeiro-Ministro, ida-ne'e mak ha'u hato'o ba Ita-Boot, se considera, ita bele *breack* ba almoço, ita filafali ou Sr. Primeiro-Ministro bele hatán agora, dois minutos.

Está bem, faz favor, Sr. Primeiro-Ministro.

Sr. **Primeiro-Ministro** (Kay Rala Xanana Gusmão): — Sr.^a Presidente, se ita sai tuku 12:00, di'ak liu tuku 2:00 ita fila. Tuku 3:00 ne'e ita naruk demais, *break* ne'e naruk demais. Ita bele sai agora bá han, ko'alia ba malu, tuku 2:00 ita fila, bele ka lae?

Sr.^a **Presidente**: — Ha'u hanoin, bele, tanba ita poupa tempo e diferenças são duas horas entre o almoço e ita filafali mai. Maibé, molok ha'u atu encerra ita-nia sessão, iha ponto de ordem rua, ida husi Sr. Deputado Aniceto Guterres.

Sr. **Aniceto Longinhos Guterres Lopes** (FRETILIN): — Obrigado, Sr.^a Presidente.

Se la iha ona inscrição, inscrição sira, Deputado sira intervém hotu ona, é considerado esgotado. Ne'e wainhira Primeiro-Ministro fó resposta ka hatán hotu ona, considera debate ba apreciação Programa Governo nian esgota ona, e ne'e bele tama kedas ona ba ida guião último ponto, intervenção bancadas parlamentares.

Ida-ne'e mak ha'u atu hatete.

Sr.^a **Presidente**: — Muito obrigado ba sugestão.

E último ponto da ordem é a Deputada Veneranda.

Sr.^a **Veneranda E. M. Lemos Martins** (CNRT): — Obrigada, Sr.^a Presidente.

Ha'u mós iha hanoin hanesan, se tempo esgotado ona, di'ak liu ita halo hotu kedas, entrega ba bancada sira halo ninia intervenção ou Sr. Primeiro-Ministro bele responde para ita atu halo hotu ohin. Tanba se ita filafali mai lokraik, la iha tan assunto ida ita atu discute, e, além disso atu ba meio dia, ita mós foin mak bá *breack* iha lanche ida, ha'u hanoin, ita bele halo hotu agora.

Muito obrigado.

Sr.^a **Presidente**: — Sr.^a Deputada, 10 minutos cada bancada, ita hein ne'e liu tuku 1:00, ne'ebe ha'u hanoin, ita opta ba *break* ba almoço, ita filafali tuku 2:00 Sr. Primeiro-Ministro hatán mak ita ba ponto 13 e ita encerra ita-nia debate.

Muito obrigada e bom almoço para todos.

Sessão plenária ne'e suspende iha tuku 12 liu minuto 5 meio dia no retoma fali iha tuku 2 loraik,

Sr.^a **Presidente**: — Srs. Deputados, husu ho respeito, ida-idak hola fatin para 2h00 ita hahú.

Sr. Primeiro-Ministro ho Srs. Membros do Governo, Srs. Deputados, espero que tenham tido um bom almoço e chegamos a vez do Sr. Primeiro-Ministro atu fó resposta ba perguntas ou preocupações dos distintos Deputados durante sessão dadeer. Ne'ebe, tempo tomak Sr. Primeiro-Ministro nian. Halo favor.

Sr. **Primeiro-Ministro** (Kay Rala Xanana Gusmão): — Muito obrigado, Sr.^a Presidente do Parlamento.

Boa tarde ba Senhora no Senhor Deputado sira.

Depois de rona, ohin dadeer, horisehik kedas, intervenções husi distinto Deputado sira, hodi IX Governo nia naran ha'u tem que fó apareço boot tebetebes, aprecia tebetebes, participação husi diversos Deputados, husi diversas bancadas, aprecia la'ós de'it ba críticas ne'ebé halo, maibé mós ba opiniões ne'ebé hasai. Ida-ne'e repete ba malu ona katak iha sessão plenária ida-ne'e, ida-ne'e katak ou loraik, ou loraik tolu, ita discute de'it maka programa. Tanba ida-ne'e, ha'u sei la hatán ba buat questão barabarak ne'ebé hanesan mós horisehik ha'u responde em geral kona-ba assunto central ida dehan apresentação programa ba tinan lima.

Deputado balu, iha sira-nia intervenção, dehan Programa ida-ne'e afinal repete mak repete bá repete mai, hanesan fali katak VII ho VIII Governo mós la halo buat ida, la'ós ida-ne'e! Ita baibain temi, Deputado barak mós temi ona, ita 21 anos, ita 21 anos, ita 21 anos, jovem, jovem, 21 anos, maibé hotu-hotu reconhece katak sei iha buat barak atu halo. Ho hanoin ida-ne'e maka, tanba balun temi ona Plano de Desenvolvimento Nacional ne'ebé foin daudauk dehan aprova iha Governo bá, mas ami mós seidauk simu, ami mós foin tama, ami la'ós preparado atu tama iha kedas tinan haat ba kotuk ne'ebá, foin eleições, maibé mós iha-ne'e temi tiha ona, Presidente Parlamento dehan katak seidauk mai discute iha-ne'e, hanesan temi karik dehan se la'ós aprovação karik, iha netik buat ruma ne'ebé dehan sente ona husi ne'e. Nune'e mós, tanba la'ós dada mai dehan ami mak halo buat hotu-hotu, lae! La'ós ida-ne'e, mas tanba guia ho Plano 2011-2023, loloos karik 2011 la halo buat ida, tanba plano

ne'e aprova iha setembro, ne'ebe hahú karik, hahú iha 2012. Ho ida-ne'e mós mak ita haree katak sei bele continua ou tem que continua.

Tanba ne'e, Deputado sira, atu dehan de'it katak apresenta plano ida-ne'e ho hanoin ida husi kotuk ne'ebá dehan katak bele continua. Ami sei mós estuda plano estratégico foun. Ha'u haree tiha ona, ha'u seidauk iha tempo atu lê, boot tebetebes, imi sei hein, fó ba membro Governo ida-idak iha área ida-idak hodi halo, haree to'ok, aceita ka la aceita. Claro que la'ós aceita tomak, assunto balu, opinião balu di'ak karik ita simu, ita tau, para haree, hanesan ami temi beibeik, haree ba revisão ba plano estratégico ne'e hodi adapta ba circunstâncias atuais. Uluk, quando ba halo buat ida ne'e, halo ho hanoin 20 anos, ita dehan katak tem que iha visão ida, ne'e maka halo tiha hodi bele responde ba início construção Estado no construção nação. Ha'u aprende buat ida-ne'e ho Mahatir. Nia dehan: «Imi tem que halo plano ida, plano naruk, imi seidauk ukun an, imi sei ukun an, tanba selae iha fatin barak tebetebes iha mundo democracia ne'e katak partido ida bá sai Governo, depois tinan lima tiha, tinan haat de'it mós sa'e fali seluk, e nune'e hela de'it, nune'e hela de'it, imi la halo buat ruma ba imi nia rain.» Ho ida-ne'e, hanoin ne'e hotu maka halo ida-ne'e hodi lori ita ho visão ida ba futuro.

Ne'e duni, la dehan katak iha VII Governo no VIII Governo la halo buat ida, dehan de'it katak visão ne'ebé ami rasik mós iha ou seidauk completo, tanba ne'e maka áreas ka setores importantes ne'ebé atu *focus* mak ami tau tiha ona iha Programa ne'e. Aprecia tebetebes tanba iha opinião balu ne'ebé reforça. Reforça ne'e hanesan ne'e: «Imi tem que haree tan ida-ne'e, haree tan ida-ne'ebá, ida-ne'e, reforça ida-ne'e». Intervenção construtiva, dehan katak keta haluha haree tan ida-ne'e, haree tan ida-ne'ebá, haree tan iha ne'ebá.

Deputada ida dehan katak «la reconhece liu saida maka Governo anterior halo, tanba produção foos sa'e ba 73%», loos, loos tebes! Ha'u dehan loos tebes ne'e bele confirma ho factos, prova. Ita iha-ne'e horisehik ne'e temi beibeik prova dos factos, prova dos factos, ha'u bele temi mós ida-ne'e tanba ha'u ba to'o interior, bá hamutuk ho população sira, e bainhira sira te'in mai ha'u, sira lori karón sira, ha'u lê ba, lê ho tetun, ha'u dehan: «*waow!*», Timor mós halo nia foos, tau iha karón ho tetun, *waow!* Ne'ebe, ha'u sente katak ami kala sala, tanba karik fó tinan ida para ami halo programa karik, ami sei halo investigação didi'ak hodi hasai hotu tiha índice ne'ebé horisehik kedas Deputado temi, mas ha'u reconhece, ha'u reconhece katak iha fatin barak população bá sosa, la hatene inglês, la hatene português, sosa foos iha karón ne'ebé hakerek ho tetun.

Deputado ida fali dehan, temi 120 dias, 120 dias, hanesan fali dehan ita atu halo uma ida ka, halo tan ida-ne'e, halo tan ida-ne'e, lae! Saida mak temi iha 120 dias nian ne'e, ha'u bele dehan karik, ba Primeiro-Ministro atu dehan: «Iha 120 dias ne'e imi haree to'ok hodi hahú ona buat ruma, iha saida-saida, matéria sira ne'ebé tau iha-ne'ebá». La'ós katak atu hotu kedas iha 120 dias, mas labele haluha iha 120 dias, quatro meses, tem que nia halo ida-ne'e. Ha'u atu dehan, tanbasá mak ha'u dehan Primeiro-Ministro mak haree ba ida-ne'e, tanba depois de aprova tiha karik ohin ou aban, ami sei halo

orgânica. Iha-ne'e mós temi tiha ona, halo nu'usá maka membro Governo ida-ne'e kaer iha-ne'ebá, membro Governo kaer ne'ebá, keta iha duplicação karik, ida-ne'e ami prepara hela mós orgânica. Tanba Governo só sai legítimo depois de Parlamento aprova Programa, ho ida-ne'e mak ami bele apresenta ona orgânica. Tanba mós, depois de orgânica, sei haree ba Orçamento Retificativo, to'o dezembro.

Tanba ita hotu, balu concorda katak tem que iha correção iha-ne'e, hadi'a ida-ne'e, correção iha-ne'ebá, hadi'a ida-ne'ebá. Atu dehan karik katak bele karik ita hakarak nafatin mantém buat ne'ebé ami temi, kala temi sala karik, mantém irregularidades ne'e, ita mai aprova, aprova de'it, taka matan tiha aprova de'it. Ho orçamento ida tama ona iha retificativo, tanba la exige ona programa, ita bele *virement*, ita ho «bens e serviços» bele contrata casuais, ho «capital menor» ita bele selu ema, ne'ebe, à vontade loos. Mas, tanba ami temi regras ne'ebé ita tem que tuir, ne'e maka iha Orçamento Retificativo, depois de aprova ida-ne'e, ami sei haree, haree ba orgânica, depois de orgânica aprovado tiha, sai tiha oficial, pronto, ami haree ona ba Orçamento Retificativo, atu iha cada Ministério bele haree saida mak bele halo ona nu'udar urgente karik to'o iha dezembro.

Maibé mós, depois Orçamento Retificativo, ami sei buka haree ba plano de ação de anual 2024, tanba programa temi iha-ne'e ne'e tinan liman nian. Como tinan liman nian, tinan ida-idak, 2024, 2025, 2026 no 2027, saida mak ita bele halo iha tinan 2024, para ita bele continua iha tinan 2025, saida mak ita hahú iha 2025 de'it maka continua iha 2026, ne'e hotu ami halo tiha plano ida-ne'e. Orçamento anual ba 2024, la'ós katak iha 2024 saida mak tau iha-ne'ebá ne'e tem que hotu, hotu kedas ona, lae! Iha programas karik plurianuais, iha programas ne'ebé permanentes, buat sira-ne'e hotu tuir regras ne'ebé uluk ami aplica. Ne'e duni, iha-ne'ebá iha ona plano de ação anual, ne'ebé ami sei apresenta la sai husi programa ne'ebé ami apresenta iha-ne'e, maka sei discute Orçamento Geral de Estado ba 2024.

Ne'e duni, ohin temi assunto barak, ha'u husu ba membro Governo sira, sira aponta hotu. Barak, assunto barak, quando filafali mai la'ós iha Orçamento Retificativo tanba Orçamento Retificativo ne'e hanesan atubele selu no responde ba questões urgentes ka necessários tebes to'o dezembro.

Plano de ação anual atu depois discute ona Orçamento Geral Estado ba 2024, sim, ida-ne'e Ita-Boot sira iha poder tomak atu husu ba ami didi'ak, nu'usá mak la halo ona, nu'usá mak hein fali ba 2025? Ida-ne'e bainhira mak hotu, 2024, 2025 mak hotu ka? Ida-ne'e 2025 to'o 2030 mak hotu ka? Depende ba dimensão programa ne'e ninian.

Agora, ohin Sr. Deputado Óscar Lima, loos duni, problema setor privado problema boot, problema boot em relação ho ninia capacidade. Uluk mós ha'u sempre halo reunião ho setor privado, beibeik, beibeik e beibeik, to'o loron ida sira dehan: «Lalika ona!, Ó mai ko'alia ba ami hanesan ami la hatene buat ida. Ami mós iha hanoin, ami mós hakarak halo ida-ne'e, mas iha-ne'e ne'e, ne'e, ne'e, ó

bele lori mai, então semana mai ne'e ita hasoru mali fali». Ne'e significa katak precisa crédito, precisa buat ruma ne'ebé fó apoio.

Ho buat sira-ne'e hotu mak aprecia tebetebes opinião sira-ne'ebé ohin temi, loos, tanba tuir ami temi tiha ona iha programa, setor privado nacional sei sai parceiro boot tebetebes ba desenvolvimento Nação ne'e nian. Quando ita dehan setor privado nacional, la'ós de'it companhia boboot ne'ebé kaer ida-ne'e, companhia ida-ne'ebá, maibé iha programa mós ami temi ona micro, pequenas, médias empresas, hahú kedas husi comunidade sira. Ida-ne'e katak iha programa ne'e, Ita-Boot sira bele haree, para além de tau matan ba setores ne'ebé mesmo América, mesmo Europa, mesmo iha rai sira desenvolvidos la bele taka matan ona, hanesan educação hanesan saúde, para além de buat sira-ne'e hotu, ba ita-nia an rasik no Timor-Leste, ba ita-nia an rasik ho visão ida que naruk, hodi ita mós temi katak educação ida di'ak, ita sei forma futuro líderes ba Nação ida-ne'e, economia maka tema central, karik ha'u bele dehan, tema importante liu iha programa ne'e. Tanba Deputado ida dehan «Kadoras», está bem! Imi temi «kadoras, kadoras, imi temi kadoras, rona ona katak Bayu Undan ninian 2026 atu hotu ona, agora nu'usá, nu'usá», sim, ami tau iha 2026, 2026 ne'e estudo uluk ninian, agora ami sei halo fali avaliação di'ak ida. Maibé, la'ós tanba Bayu Undan, tanba ida-ne'e maka bainhira ita ko'alia, ita temi dehan osan povo nian la bele gasta arbiru hanesan ne'e, tem que iha naran sá didi'ak, ida-ne'e tanba ida-ne'e duni, tanba fundo petróleo mós começa reduz. Ho ida-ne'e, tanba começa reduz ne'e maka uluk hanoin kedas dehan em vez hasai de'it, hasai de'it, hasai de'it, halo empréstimos hodi hasai tiha uitoan para la bele sai lailais barak kedas. Mós temi ona katak iha futuro mós bele kaer ações sira, ha'u mós horsehik temi tiha ona, ita investe tiha ona fundo petróleo 45%, ohin, husi de'it investimento ne'e ita hetan tan 8 bilhões tama iha fundo petróleo, portanto, ne'e hotu. Maibé, enquanto seidak, tanba ida-ne'e mak ami tau foco, foco principal iha tinan liman ne'e atu hahú duni kadoras mai.

Ora, dehan, «Imi iha ona estudo viabilidade ka lae? Financiamento oinsá?», sim, estudo viabilidade iha ona. Se ha'u hakarak perde tempo uitoan, iha kedas Comissão de Conciliação, husi *Woodside* ho surat sira hanesan ne'e, ami kaer, ami soe iha Comissão nia oin, dehan: «Ida-ne'e lixo tanba la temi buat ida». Hanoin katak ita la compreende kedas buat ruma, soe tiha, ami fó fali aminian.

Iha fali Singapura, iha último encontro, ko'alia kona-ba financiamento, sai jornal ida iha loron ida-ne'ebá kedas, jornal internacional ida, *Economic* – pronto, jornal ida hotel mak fó – ami hotu lê, ami atu bá reunião ho Comissão ne'e, Comissão atu husu ba *Woodside*, husu ita, dehan: «Imi atu financia oinsá?» Jornal ne'e dehan: «*Woodside cash* mós la iha». Ami to'o iha-ne'ebá ami dehan: «Ne'e la'ós ami mak inventa, buat mak ne'e. Se *Woodside* bele husu empréstimo ba banco, ami mós bele tanba ami mós iha Fundo Minarai» Buat sira-ne'e hotu.

Ne'ebe, atubele dehan karik katak ami *fokus* ba ida-ne'e, tanba sei fó la'ós de'it osan, maibé sei fó emprego ba Timor, emprego de qualidade ba timoroan sira no efeitos multiplicadores diretos no indiretos. Ida-ne'e mak importante tebetebes.

Ne'ebe, ko'alia kona-ba micro, pequena e média empresa, tau ho agricultura, pecuária, turismo, buat sira-ne'e hotu, Ita-Boot sira, ne'ebé ha'u respeita tebetebes, bele haree katak tema central boot liu iha programa ne'e ko'alia kona-ba economia, para além de setores ne'ebé iha mundo ohin loron mós tem que ser nafatin: saúde, hanesan ita temi, ho educação.

Ne'e duni, atubele dehan karik katak se 2026 ami sei prepara buat hotu-hotu, iha leis balu ne'ebé ami sei lori mai to'o iha-ne'e, ho buat sira-ne'e, mai discute iha-ne'e, fó hatene ba Deputado sira.

Se 2026 bele começa, ita bele dehan 2030-2031 produção bele tama, bele tama! Gás, se gás tinan hira tan gás maka fornece energia ba eletricidade, barato liu, ita-nia gás rasik, tanba husi *Bayu Undan* iha Darwin sira na'ok tiha buat ida-ne'e, gás, fornece ba sira-nia an rasik, e ita la simu buat ida. Buat sira-ne'e hotu mak halo ita hotu... Tanba ida-ne'e kona-ba kadoras, sim, iha estudo viabilidade; financiamento, sim, iha capacidade ida ita atu halo oinsá de'it depois ita sei ko'alia tan iha-ne'e.

Ho banco ne'ebé bele ona fó crédito longo prazo – longo prazo ne'e la'ós 50 anos – mas longo prazo katak, iha-ne'e mós temi tiha ona parece que Deputado Óscar Lima mak temi, 100 mil 200 mil, ne'e ka lae? 100 mil, 200 mil ba ida-ne'e, pelo menos funan labele boot. Primeiro, fó funan ne'e ita bele dehan katak ba *administrasi* bá. Sira la'o, lao, lao di'ak, acompanha didi'ak la'o nafatin, lao di'ak, lao acompanha didi'ak, bele husu tan barak liután, funan sa'e uitoan para ajuda, la'ós atu banco ida be fó crédito ne'e atu hatama tan de'it osan, lae! Tanba ida-ne'e mak Governo tem que iha-ne'ebá hodi assegura política ida-ne'e, selae, se banco privado, nia hakarak mak hatama osan, nia hakarak mak hatama osan.

Ho hanoin sira-ne'e hotu maka, ha'u ohin temi ona, programa ne'e, para além de setores ne'ebé... iha mundo tomak, iha Portugal, iha greves professores nian, doutor, médico sira-nian – tanba funu Ucrânia ninian maka estraga buat sira-ne'e hotu – iha Espanha, iha França, ne'ebe, educação ho saúde ne'e buat ida permanente iha fatin hotu-hotu.

Agora, ita ohin temi: «Ita 21 anos, 21 anos, seidak consegue buat ida», ha'u bele dehan ba Ita-Boot sira katak ha'u la percorre mundo ida, bá fatin balu, bá iha fatin balu. Ha'u temi de'it ida, República Central Africana, hetan independência iha 1962, 2014-2015 ha'u bá to'o iha-ne'ebá, ha'u dehan: «Waow, aat liu ita». Ho ida-ne'e mak ha'u bele convence sira atu pára, hamenos tiha conflito iha-ne'ebá. Ha'u dehan: «Ami foin 2002, imi husi 1962, mas buat sira sai hanesan ne'e nafatin?». Ne'ebe, sim, ita bele dehan katak depois de 21 anos ita la halo buat barak – ita hotu – ita seidak halo buat barak, ita seidak halo buat hotu, loos! Mas, bainhira ita hasai ita-nia matan husi ita-nia sapatato de'it, hateke uitoan ba fatin seluk, ita di'ak liu uitoan iha buat balu, iha desenvolvimento, iha

infraestruturas, iha ida-ne'e, iha ida-ne'ebá. Ne'e duni, loos, ita sei precisa nafatin, ita sei precisa nafatin serbisu maka'as, ita sei precisa nafatin cooperaçãõ ne'ebé di'ak. Ohin balu temi consenso, consenso, consenso sira-ne'e, dala ruma ohin temi husi oposiçãõ, sim, ida-ne'e ami concorda, ida-ne'e ami la concorda, falta mak ida-ne'e, ida-ne'e ita hetan daudauk ona consenso. Consenso la significa katak taka tiha matan be tinan lima la halo buat ida mós... lae! Consenso katak, «sim, iha ona visãõ ida-ne'e ba tinan lima, mas ami sei, ami-nia liman sei hatudu nafatin, ami sei haree nafatin, imi serbisu ka la serbisu, buat sira-ne'e hotu». Ne'ebe, buat ida consenso hamosu unidade de pensamento. Unidade de pensamento la'ós dehan ita tem que dehan di'ak, di'ak, di'ak ba buat hotu-hotu, lae! Ba buat principal ne'ebé ita hakarak atu alcança ita bele hetan cooperaçãõ.

Ne'e duni, ha'u la responde ba buat barabarak ne'ebé ohin temi tiha ona, tanba problema ita mai atu discute programa, quando ita mai atu discute buat sira seluk karik, ida-ne'e ita hatán, hatán *langsung*. Ha'u husu desculpa barak, horisehik ha'u viola tiha regras de respeito ba Uma-Fukun ida-ne'e tanba hakilar ha'u-nia amigo boot ida – boot tanba nia kabun mak boot –...

Primeiro-Ministro hamnasa.

... amigo boot loos, Deputado David, mas ami nunca hirus malu, ami hakilar malu mas nunca hirus malu.

Ne'ebe, ho respeito tomak husu ba Ita-Boot sira katak buat sira-ne'ebé Ita-Boot sira temi tiha ona, ministro sira hakerek hotu, hakerek hotu, hakerek hotu. Quando to'o mai atu apresenta Orçamento Geral do Estado ba 2024, ami sei apresenta mós ho plano de açãõ anual ne'ebé hasai husi programa ida-ne'e, sim, ne'e ita bele dehan nune'e: «Ó haree ona ka lae? Ne'e, ne'e! Dados, dados», tanba ohin barak temi: «Ai ami aprecia, ami elogia, ami nune'e, tanba iha tempo badak bele apresenta ona». Ne'ebe, karik ami tem que gasta tempo ba haree buat hotu-hotu, kala tinan ida mak foin ami bele apresenta programa ne'e. Ne'e duni programa ne'e visãõ ba tinan lima. Iha ona, cada tinan, 2024 ba A, A ne'e tinan tolu, B, B tinan rua, C e D ne'e tinan ida ami bele hotu, nune'e. Ita bele controla malu tanba Ita-Boot sira iha direito no responsabilidade atu controla ami. Ne'e duni atu relembra filafali katak *fokus* ba Governo ne'e maka Economia.

Oinsá ita dudu? Oinsá ita motiva ita-nia ema sira começa ona halo? Lae, ha'u sente katak hotu-hotu concorda ho ha'u, e ida-ne'e ha'u husu atu concorda ho ha'u, katak Díli la'ós capital de Timor, Díli capital de hmmm, kios. kios, kios, kios ida hmmm, bá fali to'o interior, bá to'o kedas iha foho leten mós fa'an sasán sira-ne'e, oiilh. Ida-ne'e mak sai preocupação boot ida ba ita, tanba ne'e mak temi importaçãõ, temi importaçãõ, temi importaçãõ ne'e tanba atu dudu ita-nia povo dehan «ó produz bá, ó fa'an ba ita-nian».

Ne'ebe, sei difícil, sei difícil, mas ita fiar katak ita-nia povo bainhira nia começa sente ona katak iha ona mais valia ida husi nia an rasik, iha ona buat ruma ne'ebé tama ba nia uma laran, ita sente katak ita bele la'o tanba ita mós fiar povo ida-ne'e, povo ida que, quando oportunidade mosu, sei halo buat barak. Ne'e primeiro.

Segundo, pedido ba consenso karik. Karik bele, ha'u mak hanesan soe de'it, karik bele, quando ita ko'alia kona-ba descentralização, iha formação técnicos ba governos locais, ba governos regionais ka municipais, favor ida ita kaer tiha ita-nia cor ne'e tau tiha iha kotuk, para hotu-hotu haree município nia oan, forma iha finanças, iha administração, iha planeamento, iha ida-ne'e, forma hodi Governo bele descentraliza to'o iha kraik ne'ebá.

Kona ona assembleias municipais, ahh, está bem, partido sira bá bla bla bla, mas husu ita hotu, ita hotu, quando participa hanesan ne'e povo sei la dehan katak: «ahh, partido ida-ne'e mak mai halo ida-ne'e», lae! Ba Governos locais labele! Hanesan mós ohin temi ona katak Comissão Função Pública iha ona, tanbasá mak na na na...? lae! Sei iha irregularidades. Tanba ne'e mak ita hotu, se bele, iha Uma Fukun ida-ne'e, Casa Magna ida-ne'e, iha compromisso ida katak atu prepara técnicos ba iha municípios, ita labele lori cor, ita bá nu'udar responsáveis Nação ne'e nian atu bá forma, atu bá fó kbiit ba município nia oan sira, dehan katak: «Hmmm, mai, mai kaer ida-ne'e, kaer desenvolvimento iha ó nia rain ida-ne'e!».

Ora, quando to'o tempo bá assembleias municipais, sim, tem que iha husi partido sira, eleição sé mak manán sé mak la manán, mas atu haree ba saida maka... tanba se ita ko'alia kona-ba desenvolvimento husi Governo, – ne'e experiência ida la boot liu ema seluk nian, experiência oan ida que ha'u iha IV no V Governo – apesar de ita ki'ik mas tanba ita seidauk desenvolvido didi'ak, Governo husi Díli, Governo central ne'e la bele, la consegue responde ba necessidades hotu-hotu ne'ebé iha, tanba ita mós foho boot, naruk, boot no ki'ik, povo balu hela iha-ne'ebá, 20% da população ne'ebé seidauk hetan ahi, hmmm, sira hela iha fatin ne'ebé dook atu mate, sira-nia oan sira atu bá escola, oii, susar atu mate. Ne'e duni, se ita hakarak atu dudu desenvolvimento husi ne'ebá kedas, Governo central la consegue. Se nia fó uluk ba suco ida, iha-ne'ebá dehan: «Ehh, haree ba suco ne'ebá tanba ne'e pertence ba sira-nia partido ou votos barak liu mai husi ne'ebá mak fó ne'e». Mas la'ós! Tanba considera katak fatin ne'ebá precisa liu karik. Ne'ebe Governo descentralização maka sei bele responde, sei bele responde iha necessidades urgentes população nian, sei bele responde iha ato sira seluk.

Ne'e duni se ita ko'alia agora micro, pequena, média empresa, ida-ne'e mós ita tem que forma ita-nia ema sira iha kraik ne'ebá, la'ós fali husi Ministro mak bá kaer tau, tau, tau, lae! La iha ida! Ne'e duni tinan lima ne'e ita hotu hamutuk bá, hodi cria bases ba povo sente katak tanba, hanesan ha'u temi tiha ona iha-ne'e, descentralização quando ita halo ho di'ak, sei sai, povo sei dehan: «ida-ne'e segunda independência», tanba sira mak kaer, sira mak hatene. Deputado sira husi Assembleia bá to'o iha-

ne'ebá tanba besik, sira dehan nune'e mai iha Governo: «Nu'usá mak la haree ida-ne'ebá? Nu'usá mak ida-ne'e seidak? Nu'usá mak ida-ne'ebá seidak?» Ho ida-ne'e, la'ós de'it ba infraestruturas, ba necessidades básicas população ninian, iha saúde, educação, infraestruturas, iha saneamento no iha tan buat seluk, maibé mós iha problema ida ita temi agora: agricultura, pecuária, turismo, buat sira-ne'e hotu. Ita mesak de'it ita la bele. Ne'e ha'u reconhece nu'udar Primeiro-Ministro, ida-ne'e que dala tolu, ha'u tem que reconhece katak Governo iha Díli de'it la consegue, ita tem que hala'o ona ida-ne'e. Bá iha ida-ne'e, ba governos municipais ida-ne'e, ha'u halo apelo ida, ita hamutuk ba iha funu foun, iha funu foun ida-ne'e.

Ne'ebe, ha'u atu ko'alia de'it kona-ba programa, ha'u la responde ba questões barabarak ne'ebé temi iha-ne'e, tanba la'ós tempo ne'ebé exato. Ne'e duni, Deputado sira, ho respeito tomak, aprecia tebes imi-nia vontade hasai opiniões, opiniões ho críticas, ami simu. Opiniões ho críticas construtivas, ho recomendações ida-ne'e maka bele halo katak ita-nia Estado de direito democrático usa duni ninia instituições, povo bele fiar katak ita ho mandato ita-nia povo nian, imi ho ami, ita hamutuk haree to'ok povo ne'e atu la'o bá ne'ebé.

Mak ne'e de'it.

Ho hakru'uk boot, obrigado barak tebetebes ba Ita-Boot sira.

Sr.^a **Presidente**: — Muiíssimo obrigada, Sr. Primeiro-Ministro.

Tuirmai, ita tama ba ita-nia guião n.º 13, ne'ebé hatete: «No final do debate, a Mesa dá palavra aos líderes das bancadas parlamentares e ao Primeiro-Ministro para querendo proferirem uma declaração final pelo tempo máximo do 10 minutos».

Hodi nune'e, ha'u fó kedas tempo ba Bancada da FRETILIN hodi hahú. No tempo de 10 minutos, Sr. Deputado.

Sr. **Aniceto Longuinhos Guterres Lopes** (FRETILIN): — Obrigado, Sr.^a Presidente.

Boa tarde ba Excelência sira hotu, em particular ba Excelência Sr.^a Presidente do Parlamento Nacional, Excelência Sr. Primeiro-Ministro do IX Governo Constitucional, Vice-Primeiros-Ministros no restantes membros do Governo.

Ilustres membros do Governo e distintos e distintas Deputados, hafoin hetan anúncio resultado eleição legislativa 2023 nian, liderança FRETILIN declara ona publicamente katak FRETILIN sei sai oposição ida-ne'ebé ativa, positiva no construtiva, no sei la desempenha funções governação ruma País nian. Biar la kaer ukun ka hela iha oposição, hanesan FRETILIN hatudu beibeik no prova ona, nu'udar força política ne'ebé sempre interessado promove no defende interesse Estado no interesse povo tomak nian, ba interesse sira hanesan ne'e FRETILIN sempre buka dalan hotu-hotu ne'ebé

possível hodi contribui, e contribui ho honestidade, contribui ho frontalidade no objetividade, no ho sentido Estado, ne'ebé mak carateriza an iha FRETILIN ninia ato sira durante ne'e.

Hanesan hato'o ona iha ha'u-nia intervenção inicial ba debate apreciação ida-ne'e, ha'u hakarak reafirma fali posição Bancada FRETILIN nian katak FRETILIN la iha objeção ba programa IX Governo Constitucional nian, ne'ebé ohin daudauk ne'e ita conclui nia debate ba apreciação. La iha objeção significa que, enquanto oposição, FRETILIN hakarak colabora iha implementação do Programa do IX Governo Constitucional, desde que hetan base husi entendimento político ruma no fó importância ba Estado no povo nia bem comum liuhosi estabilidade política, governativa, atu garante paz. Hakarak colabora, ho expressão, ho linguagem vulgar nian karik «colabora mas não entra».

Deputado balu hamnasa.

Balu hamnasa ona, kala associa ona ba buat seluk karik, então, ha'u fila tiha liafuan ne'e katak «não entra mas colabora». Lokraik matan dukur ita hamnasa uitoan.

Excelência Sr.^a Presidente, Sr. Primeiro-Ministro no distinto Deputado sira hotu, husi fatin ida-ne'e ha'u convida ita hotu, convida líderes nacionais, líderes partidos políticos, ita Deputado sira hotu iha Uma-Fukun ida-ne'e, político sira hotu, mai ita respeita confiança povo nian ne'ebé expressa ona iha urna, iha eleição legislativa 21 de maio de 2023, nu'udar confiança ne'ebé prevalece interesse hotu-hotu nian. Ho ida-ne'e mak ita bele hahú ho cultura política democrática foun, hanesan ha'u menciona ona horisehik iha ha'u-nia intervenção inicial. Tanba ne'e, lori Bancada FRETILIN nia naran, dala ida tan, hakarak hatete sai katak FRETILIN hakarak IX Governo Constitucional ida-ne'e ukun to'ó rohan husi nia mandato. Ne'e la'ós apenas posição política de'it, maibé constitui compromisso ida mós. FRETILIN halo nia compromisso ida-ne'e tanba hateke ba kotuk, ba lala'ok Estado nian durante tinan hirak ba kotuk, ita sente duni instabilidade política governativa sira-ne'e lori folin ne'ebé karun tebes no prejudica interesse povo nian ba desenvolvimento nacional. Ita lakon oportunidade barak tebes atu desenvolve ita-nia Rain ne'e, estabilidade Estado importante liu ba buat hotu.

Excelência Sr. Primeiro-Ministro, ho FRETILIN nia posição no compromisso ida-ne'e, IX Governo Constitucional ne'ebé Ita-Boot chefia nu'udar Primeiro-Ministro bele sente seguro atu ukun to'ó rohan Ita-Boot nia mandato. Tanba ne'e, permite ha'u, antes ha'u taka ha'u-nia intervenção badak ida-ne'e, ho respeito tomak lori Bancada FRETILIN nia naran ha'u husu ba Excelência Sr. Primeiro-Ministro atu retira pedido voto de confiança ne'ebé submete mai tiha ona iha Parlamento iha loron hirak liubá. Se aceita ha'u-nia pedido ne'e, ita termina ita-nia debate apreciação ida-ne'e ho programa ida-ne'ebé programa Timor-Leste nian, programa povo tomak nian.

Obrigado.

Sr. Deputado sira, Sr. Primeiro-Ministro no Sr. Membro Governo sira basa liman hotu.

Sr.^a **Presidente**: — Tuirmai, husi Bancada PLP

Sr.^a **Maria Angelina Lopes Sarmiento** (PLP): — Obrigada, Sr.^a Presidente do Parlamento Nacional, muito boa tarde.

Boa tarde ba Sr. Primeiro-Ministro, ilustres membros do Governo, distintas e distintos Deputados no povo doben Timor-Leste.

Baseia ba Constituição RDTL, artigo 109.º, Parlamento Nacional bele apresenta moção de rejeição ka Governo bele apresenta votos de confiança ba programa do Governo. Eleição 2023 hatuur momoos katak partido CNRT hetan votos maioria husi povo doben Timor-Leste, ida-ne'e nu'udar confiança ne'ebé povo Timor-Leste fó ba partido CNRT atu ukun durante tinan lima. Ukun ne'e nu'udar alternância, katak cada tinan lima povo mak decide atu fó fali fiar ba partido seluk, la iha partido ida mak bele ukun to'o rohan. Ami haree mós katak Programa IX Governo Constitucional nian reflète mós prioridade sira-ne'ebé balu fó continuidade ba programa sira husi Governo cessante ninian, maibé balu sei la continua, balu foun, no balu atu halakon. Programa setorial sira leno an mós ba Plano Estratégico Desenvolvimento Nacional 2012-2030, embora metas barak mak desatualizado no resultado barak mak la alcança, no ita admite katak impasse política mós contribui hodi la alcança meta sira iha Plano Estratégico Desenvolvimento Nacional. Alem de ne'e, Estado membro sira mós iha dever atu opta Objetivos husi Desenvolvimento Sustentável, nu'udar matan dalan atu país membro sira usa iha nia programas no orçamentos.

Programa IX Governo nian fó prioridade neen nu'udar compromisso político IX Governo Constitucional nian, hanesan: reafirmar o Estado de direito democrático; desenvolver o capital social; desenvolver as infraestruturas; desenvolver a economia; consolidar a governação no promover a governação e combater a corrupção. Programa sira, de facto, apresenta duni objetivos, tarefas no medidas ne'ebé sei adota no orientação política, maibé dados mínimo liu no até dados balu la atualizado. Maibé com todo o respeito pela democracia, ami fiar katak Governo iha dever atu hato'o programa mai Uma-Fukun ida-ne'e atu hetan apreciação.

Bancada PLP agora posiciona an hanesan bancada oposição no sei atua ho crítico maibé construtivo. Hanesan salienta mós husi líder máximo PLP nian katak la iha objeção atu fó apoio ba IX Governo ida-ne'e, ho gesto ne'ebé Primeiro-Ministro cessante hatudu liuhusi fó termo de entrega husi VIII Governo Constitucional nian serbisu ba IX Governo Constitucional ho profissionalismo no responsabilidade hodi hatudu cultura positiva katak ukun to'o rohan no gesto ikusliu mak entrega ho responsabilidade ba IX Governo Constitucional tanba missão cumprida durante cinco anos ukun. Ho nune'e, ami-nia posição hanesan oposição ami fó nafatin apoio construtivo ba IX Governo

Constitucional. Maibé, tanba hanesan hatuur iha Guião n.º 15, ne'ebé ohin reitera ona husi bancada FRETILIN, Governo apresenta votos de confiança, husu atu Parlamento aprova voto de confiança ne'ebé Governo hato'o e, tanba confiança ne'e la'ós mai husi Uma-Fukun ida-ne'e mak atu fó, mas mai kedas husi povo iha dia 21 de maio de 2023, partido CNRT ho nia aliado povo deposita ona nia confiança ba Ita-Boot sira, nune'e ami husu, karik Governo harak retira, depende decisão Governo nian. Maibé, se Governo hakarak mantém hodi cumpre artigo 109.º atu hetan voto de confiança, ami, Bancada PLP, la iha objeção.

Muito obrigada, Sr.^a Presidente.

Sr.^a **Presidente**: — Tuirmai, ba Bancada do KHUNTO.

Sr.^a **Olinda Guterres** (KHUNTO): — Boa tarde ba Sr.^a Presidente do Parlamento Nacional, Vice-Presidentes, Secretárias da Mesa, Excelência Sr. Primeiro-Ministro ho elenco governamental tomak, colegas Deputados no maluk rona-na'in sira. Ha'u-nia boa tarde ba Ita-Boot sira.

Ha'u sei lê ho ha'u-nia makassae, karik sé mak compreende bele compreende, sé mak la compreende, paciência.

Excelências, nos últimos anos, entre 2020 e 2022, a COVID-19 apresentou, não apenas a Timor-Leste, mas à comunidade global, um terrível conjunto de desafios a serem adicionados aos desastres climáticos e de biodiversidade em curso. O anterior Governo, o VIII Governo, liderado pelo Sr. Taur Matan Ruak, teve de adequar o seu programa a um programa de emergência que respondesse a esses desafios. Perante os danos que estavam sendo infligidos pela pandemia, acredito que o VIII Governo respondeu com sucesso a esses desafios e, portanto, está de parabéns.

O VIII Governo merece respeito por ter salvaguardado o nosso bem-estar nacional durante um período tão difícil. O mundo já estava próximo de uma crise climática muito antes da existência da COVID-19. Essa pandemia atuou como um catalisador, permitindo que os governos de todo o mundo implementassem políticas que antes eram consideradas impossíveis.

Agora, a pandemia terminou completamente em Timor-Leste, e essa é uma grande oportunidade para nós, como legisladores, e para vós, como Governo, tomarmos as medidas e ações necessárias para providenciar tudo o que é necessário para construir uma sociedade melhor e um futuro seguro para todas as coisas vivas: os seres humanos, as florestas, a terra, o mar, e todas as criaturas que nele vivem. Este Programa do IX Governo concentra-se na recuperação da nossa economia, na reconstrução e fortalecimento da nossa sociedade, na renovação e assistência às nossas comunidades, na proteção e conservação do meio ambiente e na resposta aos desafios que Timor-Leste enfrenta no desenvolvimento nacional.

Observo que este novo Governo está focado no desenvolvimento, na comercialização, industrialização, educação, na criação de novos empregos, na preparação de empregos para o futuro, na recuperação económica, na erradicação da pobreza e na melhoria da qualidade de vida do nosso povo.

Acho que o trabalho pela frente deste novo Governo é imenso. Algumas das suas maiores tarefas incluem alcançar a solidariedade social e igualdade de oportunidades, alcançar harmonia ecológica e equidade económica, garantir os meios de subsistência da nossa terra, a construção de moradias para todos e preservar o nosso património histórico e cultural.

O Partido KHUNTO apoia as iniciativas deste Programa do Governo. Embora sejamos da oposição, reconhecemos este programa como um bom programa e quase o mesmo que foi apresentado no mandato inicial do VIII Governo Constitucional, liderado pelo CNRT, Maun Boot Kay Rala Xanana Gusmão, Governo do qual também fez parte o Partido KHUNTO.

Felicitemos o Sr. Primeiro-Ministro, Sr. Kay Rala Xanana Gusmão, Maun Boot, e o IX Governo, apoiamos o vosso programa sem reserva.

Sr.^a **Presidente**: — Halo favor, Sr. Primeiro-Ministro.

Sr. **Primeiro-Ministro** (Kay Rala Xanana Gusmão): — Sr.^a Presidente da Bancada KHUNTO, Makasa'e ne'e internacional duni.

Sr.^a **Olinda Guterres** (KHUNTO): — Tau lerek bá, Sr. Primeiro-Ministro, do que ita ko'alia ita-nia lian de'it, ha'u-nia lian Makasa'e mós tem que tama.

Obrigada.

Sr.^a **Presidente**: — Muito obrigada ba Partido KHUNTO.

Tuirmai, Bancada do PD.

Sr. **António da Conceição «Kalohan»** (PD): — Muito obrigado, Sr.^a Presidente do Parlamento Nacional.

Excelência Sr.^a Presidente do Parlamento Nacional e a composição da Mesa, Excelência Maun Boot Primeiro-Ministro, Excelência Senhores Vice-Primeiros-Ministros, ilustres membros do Governo, distintas Deputadas e distintos Deputados, povo doben Timor-Leste, «Hametin ukun rasik an, harii Nação husi base».

Excelências, ita to’o ona ba rohan debate Programa IX Governo Constitucional nian, programa governação husi Governo Aliança Democrática, constituído husi Partido CNRT no Partido Democrático, ba tinan lima nia laran, husi 2023 ba 2028.

Partido Democrático saúda participação ativa dos Deputados, nu’udar forma de responsabilidade atu facilita debate do Programa do Governo to’o remata.

Participação Deputados husi bancada tolu oposição nian, hanesan Bancada da FRETILIN, Bancada KHUNTO no Bancada PLP, no mós participação pronta dos Deputados do Partido CNRT no Partido Democrático, Deputados da bancada do Governo, confirma no reafirma cumprimento de responsabilidade ita hotu nian nu’udar representantes legítimos husi atos democráticos resultantes husi eleição democráticas ne’ebe ita foin liu iha fulan-maio ba kotuk, atu hala’o knaar representa povo, hodi mós hola decisão política ba vida Estado nian no mós ba vida Nação nian.

Bancada Partido Democrático hakarak hato’o mós apreciação ba IX Governo Constitucional, ne’ebé lidera husi Excelência Maun Boot Primeiro-Ministro, Kay Rala Xanana Gusmão, ne’ebé assume hikas responsabilidade ba fiar povo nian, ne’ebé deposita ba Partido rua ne’e, hodi sai fali povo nia servidor iha tinan lima mai ne’e.

Povo nia confiança mak Nação nia bolu, chamamento da Nação eh *panggilan bangsa*, *panggilan Ibu Pertiwi*, Inan Ko’us, Terra Mãe.

Excelências, aprovação do programa da governação significa hatán político ida hodi loke dalan ba existência legítima Governo ida-ne’e nian, liuhusi representantes do povo atu hala’o mandato ukun hodi implementa programa sira hotu nu’udar forma de servir o povo e servir a Nação.

Hanesan representante da bancada do Governo, ha’u hakarak tatoli lia atu Governo ida-ne’e honra compromisso sira-ne’ebé hato’o liuhusi programa ne’ebé foin hetan aprovação husi Deputado sira iha Casa Magna, a Casa da Democracia ne’e, nia implementação no materialização iha cada tinan durante tinan lima ne’e nia laran.

Implementação programa mak sasukat ida hola responsabilidade ba povo nia fiar, Nação nia bolu no implementação programa mak mós resposta sim ba povo nia confiança no Nação nia bolu.

Hanesan discurso Excelência Maun Boot Primeiro-Ministro nian ne’ebé temi: «dalan ne’ebé iha ita-nia oin dalan ne’ebé nakonu ho desafios, desafios ne’ebé ita tem que enfrenta ho responsabilidade» mak ha’u, nu’udar Deputado da bancada do Governo husi bancada Partido Democrático, husu atu membros do Governo sira, ho responsabilidade aas, partilha responsabilidades ukun. Partilhar significa tomar parte, sentir o peso e assumir a responsabilidade, partilhar la’ós de’it dividir, fahe ba rua ka fahe ba tolu hanesan divisão na tabuada hodi dehan: «ó nian ó nian, ha’u-nian ha’u-nian!». Ami hein tebes Governo ida de equipa e de cooperação mútua, serbisu hamutuk hala’o knaar ukun nian hodi serbí ho di’ak ita-nia povo.

Hanesan mós eis-membro ida governação dalimak iha liderança atual Primeiro-Ministro nian iha IV no V Governo, ha'u koko experiência de sucesso ne'ebé lori ha'u iha fiar-metin ba Primeiro-Ministro nia liderança, katak sei dudu membros do Governo sira atu hala'o conquistas de sucesso ba implementação programa ne'ebé ita foin aprova.

Iha governação rua ne'e iha ona conquistas de sucessos progressivos ne'ebé ha'u regista, hanesan estradas ne'ebé liga município sira to'o capital no mós liga município ho município; eletricidade ne'ebé lori naroman ba povo hodi leno mós uma kbiit laek; Porto Tibar nu'udar mós liman rohan IV no V Governo nian; no mós sucesso boot finalização Tratado Mar de Timor.

Nune'e mós iha passado, bainhira ita sei moris iha ocupação ho funu naruk, atual Primeiro-Ministro liderou e juntou o povo na coletiva conquista da sua independência, culminada com o referendo de 1999, também acredito que esta mesma motivação, este mesmo espírito corajoso e lutador, mas também orientador, irá impulsionar como chama ardente que arde a vontade e o espírito de servir de todos os membros do Governo numa só equipa para, sem vacilar, sem recuar, dar resposta aos anseios do nosso querido povo sofredor.

Nu'udar bancada do Governo, Bancada Partido Democrático hakarak hato'o mós apreciação ba hanoin crítico construtivo sira-ne'ebé mai husi partido da oposição, nomeadamente Partido FRETILIN, Partido KHUNTO no Partido PLP. Hanoin crítico sira-ne'e la'ós atu halo negação ba prioridade ne'ebé Governo apresenta, maibé contributo valioso no mós harico hanoin Governo nian atu hala'o knaar ukun nian.

Tinan 24 liu ona ba kotuk husi ita-nia hasees an husi ocupação militar regime Soeharto nian, barak la iha ona, no ita sira-ne'e mak sei hasoru malu, ita-nia povo barak mak sei nafatin moris hela ho han dala ida lora ida, enquanto ita barak bele halo ona opção ba hakarak han saida. Realidade moris ne'ebé sei nafatin hatudu mai ita hotu injustiça social, tanba maski ita timoroan hotu, ita-nia pergunta ba han nian de'it mós la hanesan. Sira-ne'ebé la iha sei husu: «Ita aban sei iha hahán ka lae?», No ba sira-ne'ebé iha liu, sira husu ba malu: «Aban ita han fali saida?»

Ita hotu hein katak tinan lima mai ne'e, ho programa ne'ebé ita aprova, bele normaliza fali situação sócio-político no sócio-económico ita-nia Nação nian, hodi ema kbiit-laek bele mós toba dukur no toba hakmatek iha kalan, atu sira bele iha nafatin vida moris, hamriik tane ita-nia Nação.

Molok atu taka, hodi fó mós posição política nu'udar parte da bancada do Governo, permite ha'u hola posição ba pedido ne'ebé Bancada da FRETILIN hato'o.

Para uma segura confiança que não compromete os interesses do povo, a Bancada do PD solicita às bancadas do Governo e às bancadas que desejam um compromisso renovador e inovador para uma mudança para o futuro, solicitamos o voto de confiança apresentado pelo Governo para uma nova concertação política no Parlamento Nacional, para uma nova jornada política do país para estes cinco anos.

Hodi taka Bancada PD nia declaração, ha'u nafatin mós ható'o ha'u-nia repto ida ka apelo ida: Mai ita hotu hamutuk, haboot ita-nia an, hodi haboot no haburas Timor nia naran ho hahalok! Hamihis buat aat, haboot buat di'ak!

Obrigado.

Sr.^a **Presidente**: — Ikus liu, Bancada do CNRT.

Sr. **Patrocínio Fernandes do Reis** (CNRT): — Obrigado ba oportunidade.

Excelência Sr.^a Presidente do Parlamento Nacional e composição da Mesa, Excelência Sr. Primeiro-Ministro, Vice-Primeiros-Ministros e restantes membros do Governo do IX Governo Constitucional, distintos e distintas Deputados, povo do Timor-Leste, Bancada CNRT, iha oportunidade ida-ne'e, hakarak ható'o ami-nia agradecimento ne'ebé boot ba povo Timor-Leste, ne'ebe fó hikis fali confiança ba Partido CNRT no Partido PD atu assume responsabilidade ukun hodi ba serbí povo no Nação. Nune'e, horisehik no ohin IX Governo bele consegue lori programa mai halo debate iha Parlamento atu hetan apreciação husi Deputado sira iha Parlamento Nacional.

Programa ne'ebé Governo lori mai, hatuur iha compromisso neen, Bancada CNRT haree katak compromisso neen ne'e todan ba Governo, maibé ida-ne'e mak responsabilidade ida-ne'ebé ita-nia povo deposita ba partido rua ne'ebé kaer ukun daudauk ne'e.

Nune'e, Bancada CNRT hakarak aproveita mós oportunidade ida-ne'e hodi fó apreciação ba bancada oposição sira ne'ebé halo apreciação do Programa do Governo hahú horisehik to'o ohin, ne'ebé contribui ho pensamento crítico sira, pensamento inovativo sira ne'ebé construtivo atu hadi'a ita-nia povo no Nação.

Agradece mós ba afirmação sira husi bancada oposição kona-ba Programa do Governo. Nu'udar bancada Governo iha Parlamento Nacional, ami hakarak mós atu afirma katak *siap* assume ami-nia responsabilidade nu'udar bancada do Governo iha Parlamento Nacional atubele buka entendimento hotu-hotu ba política iha Parlamento Nacional, hodi nune'e bele fó espaço no biban ba Governo atubele iha fatin hodi bele introduz compromisso político sira ne'ebé tau iha programa ida-ne'e ba plano anual tinan-tinan, hodi bele fó fatin atu Governo bele ba serbí ita-nia povo no ita-nia Rain tuir compromisso neen ne'ebé hatuur iha Programa do Governo ninian.

Nune'e, la haluha atu ható'o mós agradecimento ba participação hotu-hotu, Deputado sira, público tomak ne'ebé mak participa hodi acompanha debate Programa Governo ninia durante loron rua. Agradece ba participação ativa hotu-hotu, hanoin construtiva hotu-hotu, ba programa ida-ne'e. Mesmo que bancada Governo rasik, ami considera katak compromisso ba tinan lima ne'e todan tebetebes e precisa contribuição, lolo liman husi fatin hotu-hotu atu ita hotu-hotu bele ba serbí ita-nia Nação, servi ita-nia povo.

Ne'e duni, dala ida tan, nu'udar representante bancada Governo nian, ami confirma katak sei tenta atubele buka entendimento hotu-hotu ba política iha Parlamento Nacional atu nune'e Governo ida-ne'e bele iha biban atubele serbí ita-nia povo no Nação tuir programa ne'ebé iha.

Atu taka, ami atu husu ba membro Governo sira hotu atu, halo favor, ho seriedade tulun Primeiro-Ministro atubele cumpre didi'ak compromisso ne'ebé hatuur ona iha Programa do Governo ida-ne'e.

Mak ne'e de'it, Bancada CNRT taka ami-nia declaração dehan: «Liberta tiha ona ita-nia Rain, mai ita hotu-hotu liberta tan ita-nia povo! Fiar an la'o ba oin».

Obrigado.

Sr.^a **Presidente**: — Sua Excelência Sr. Primeiro-Ministro, Ita-Boot mak sei iha tempo atu ko'alia ou declaração final liga ho debate ida-ne'e. Halo favor.

Sr. **Primeiro-Ministro** (Kay Rala Xanana Gusmão): — Obrigado, Sr.^a Presidente do Parlamento.

Atu dehan karik dala barak tebetebes ona mai iha Uma-Fukun ida-ne'e, ohin ha'u bele dehan katak ho tempo ne'ebé la'o daudauk iha construção Estado no construção Nação, ho desafios no dificuldades ne'ebé ita mós ultrapassa tiha ona to'o agora, povo bele fiar katak bainhira temi «reafirmação do Estado de direito democrático», Ita-Boot sira mak iha-ne'e hamutuk ho ami, ita reafirma daudauk ida-ne'e, Estado de direito democrático. Ida-idak ho ninia função ne'ebé Constituição fó, mandato ne'ebé povo fó, ne'ebe ita-nia hanoin ba ida de'it, atu serbí Rai ida-ne'e.

Ne'e duni, ha'u dehan katak, ohin ha'u dehan tiha ona, desde 2007 to'o 2015, primeira vez mak ha'u mai fali, primeira vez mak debate iha Parlamento, bele hatudu katak ita começa ona hanorin ita-nia jovem sira no ita-nia sociedade maturidade política. Ida-ne'e...

Senhor Deputado no membro Governo sira basa liman no, iha tempo hanesan, Sr. Primeiro-Ministro hamonu nia matan-been, hanesan expressão husi ninia sentimento haksolok.

... Nu'udar katuas ida, ha'u tem que dehan: se ida-ne'e ba nafatin iha ita-nia Rain, ita-nia povo sei la'o ba oin.

Obrigado, obrigado! ...

Emá hotu-hotu ne'ebé iha Plenária laran basa liman.

... Tanba la'ós tanba ita amigo ba malu, tanba povo ne'e, povo ne'e mak halo ita hamutuk, hamutuk iha hanoin. Tanba ida-ne'e mós mak em nome do Governo, ho participação ne'ebé crítica,

mas construtiva tebetebes, husi imi hotu, Deputado no Deputada sira, ha'u hakarak declara iha-ne'e katak Governo retira nia pedido de voto de confiança tanba confiança imi fó tiha ona.

Emá hotu-hotu ne'ebé iha Plenária laran hamriik, basa liman no Sr. Primeiro-Ministro tanis, hodi hamriik hiit documento ne'e.

... Imi fó tiha ona, imi-nia liafuan vale liu surat ida-ne'e.

Obrigado barak.

Sr.^a **Presidente**: — Muitíssimo obrigada, Sr. Primeiro-Ministro.

Hodi nune'e, Sr. Primeiro-Ministro no elenco Governamental tomak, distintos Deputados no audiência tomak, agradece ba bancadas parlamentares hotu, iha debate do Programa do IX Governo Constitucional iha situação ne'ebé pacífico no construtivo. Embora iha diferenças, mas ita-nia objetivo comum mak bem-estar do povo timorense.

Bom trabalho ba Sua Excelência Primeiro-Ministro no elenco governamental tomak ne'ebé representante do povo iha VI Legislatura deposita ba Ita-Boot sira.

Ita-nia Rain iha fase de construção, ne'ebé resultados de auditoria hodi corrige erros do orçamento iha futuro atu labele repete os mesmos erros.

Deputado hotu-hotu basa liman.

Muito obrigada e deseja bom trabalho ba IX Governo Constitucional e todos os Deputados da VI Legislatura. Bem haja!

Ho nune'e, ita remata ita-nia sessão ida-ne'e ho contente e lágrimas, maibé ita hotu hein serbisu Governo ninian. Sr. Primeiro-Ministro, ainda tem mais alguma coisa a dizer? ...

Sr. Primeiro-Ministro husu ba iha Sr.^a Presidente atu declara iha plenária katak la iha votação tanba voto de confiança retira.

...Ita la vota tanba voto de confiança retira, hodi nune'e ita la vota e aclamação por unanimidade das bancadas.

Deputado sira hotu basa liman no hamriik ba hako'ak malu ho Sr. Primeiro-Ministro.

Muito obrigada.

Sr.^a Presidente encerra sessão plenária ne'e iha tuku 15 liu minuto 23.